


T 3035.31 / 145.83 (6)

CM	0	1	2	3	4	5	6	7	8	9	10	11	12	13	14	15	16	17
Lab D50 2°	95/0/2	81/0/0	66/0/0	51/0/1	35/0/0	20/0/0	29/19/-54	55/-39/33	42/57/29	82/4/79	51/50/-13	50/-28/-29						
	38/14/16	66/16/18	50/-5/-22	43/-14/21	55/-9/-25	71/-32/0	62/34/60	40/9/-43	52/48/17	31/21/-21	72/-23/57	73/19/68						

Harvard College Library Imaging Services <http://imaging.harvard.edu>

分	為
晨	四
生	山
圖	派

哈佛大學哈佛燕京
圖書館珍藏印



九曲圖說

溪過星村分兩道一稍此流復折而東納後溪一東注獅子林右後繞向西北至靈峯脚下仍合流乃東北入山其兩溪之間則道院洲也然九曲既趨西北而溪南仙巖數峯亦隨溪旋轉反在溪之北岸自南岸道院洲以往無山峯矣靈峯奔時溪北為山水初接之遊人至此放眼平川又是一番佳境矣

武夷山志卷之十四

武夷董天工典齋編集男勸校刊

溪北

靈峯 又名白雲巖在八曲三教峯右巍然雲際懸梯登其絕頂產茶稱佳

路徑自溪濱一徑深入經邱公巖踰小嶺逶迤而上至峯腰有石峽疊石為磴約百級有石門曰雲關進此左折達白雲庵

詩 靈峯

宋朱熹

弄舟綠碧澗棲集靈峯阿夏木紛已成流泉注驚波雲關啟

蒼茫高城鬱嵯峩眷言羽衣子俛仰日婆娑不學飛仙術纍
七鷓塚多

白雲庵 在壘峯上近時新構者臨岩軒窻高敞憑欄遠眺
溪自西來盤迴如帶星村之田疇廬舍野店山橋儼然如畫
庵有石井極甘

詩 白雲庵

國朝方正璠

高山作屋何人棲不見神仙見衲子紆迴百轉陟山門下俯
平川不盈咫尺軒楹傍谷覽異葩溼亂楓林紅間紫老僧向說
平常居松窻多托蒼茫裏谷口雙丸出沒時陰霧在天晴在
底我來亭午正暄和烹酌芝泉坐停晷殘陽數落天際峯白
雲流出清溪水一覽九曲權歌回鋪聲疑自琳宮起

又

僧明曇

鈎簾舒眼界九曲景平分性靜依青嶂心空坐白雲多時徒
妄想此日挹清芬石几筠床畔微言喜共君

王復禮

種樹佳名遠播聞寒香結伴自成群千重青嶂兼丹嶂一帶
紅雲間白雲寂寞山居思點綴艷陽春色可平分迨惟萬里
橋西事覓果尋花又向君

白雲洞 在白雲菴後內藏小艇及仙蛻峯下有香石

詩 白雲洞

國朝潘錦

尋山不覺遠興至轉蕭森竒石媚幽賞白雲生道心天清松
子落日夕翠微深明發收餘眺還聞鐘磬音

又

李紹驥

石洞藏茅屋誰人此煉丹神仙去不返惟有白雲還

靈峯觀 靈峯右麓兩巖環抱中復平行有田疇數畝觀在

內元時里人余藥坡叛建初名靈峯道院太守李直嶠奏請

易名元都觀宋宗室元翰林學士趙孟頫書扁歲久傾圮成

化十八年方士王道元重建

詩 靈峯觀

明程 銓

靈峯一望白雲多誰共幽人采芡荷九曲探源還我事飄

巾為映晴波

元都觀

戴時宗

九曲斜陽意惘然靈峯獨眺見平川乘槎欲問尋河使更沂

滄洲第一天

寒巖 在觀後亦靈峯之麓也相傳有邱公者得道於此故

土人呼為邱公岩岩壁斜覆如屋亦稱邱公洞中有泉一泓

不竭黃少宗伯勒寒巖二字於壁

詩 寒巖

明謝上箴

寒岩竒絕處仙觀綠陰迷突兀元雲表踟躕曲水此冥濛飛

濕瀉淒切亂猿啼暫憇瓊宮樹無勞白玉梯

石鱗窟 繞靈峯左壁小徑入泝小澗三里許地甚幽僻中

有數椽巖際刻隱元岩

後溪 自棠嶺桃源洞一帶來九七八里遠紫芝鼓子諸峯

之背出白雲右匯於九曲

武夷山房 在後溪山坡上萬歷二十四年督學徐即登建
迎其帥中丞李見羅材講學於此亦名星村精舍左藩郭子
章有記卒遂肖像祀之曰見羅書院置田三十五畝為伏臘
之贖明末毀於兵後見羅之孫重光 字賓于 鑲 字羽先
二人謀欲興復之未果

記 武夷山房記

明郭子章

武夷山在建州之北道家稱十六洞天有宋南渡朱文公始
構紫陽精舍於五曲之湄而武夷始著我明王文成公避秦
瑾之難委蛇此中蹈海以去萬歷中豐城李孟誠先生被纒
謫居鎮海往來茲山益修明朱子之學四方朋來屢滿戶外
予兒建亦從先生游山中梵宇禪林僅備足佇師徒先生稍

厭之仍還 頤海建南諸生謀築室留先生來告予予與右丞
劉靜之參政徐獻和各蠲薪倡之魏建 陽史崇安二令利之
諸文學儒生各醵金成之至疑土度木專屬之倪生士和趙
生光孚擇地九曲之隙尋壑經邱亦與航未到處而止焉中
為堂堂前為門兩翼為橫舍堂後為燕寢階除牖闥頗稱爽
塏荆扉橫籬大似甲區營于去臘七日已於今秋望日先生
題曰武夷山房先生來謁余記余惟名山大川托重高賢武
夷之著始於文公繼以文成又繼以先生五百年內三宅賢
人蓋不為不幸矣匪直茲山為然也斯道之明亦復如是三
先生者非相與共明大學之道者乎大學入門始以格致文
公曰人心之靈莫不有知又曰獨者人所不知已所獨知以

靈訓知以知訓獨深矣猶思人心未悟也則又曰知猶識也
遂使求內者牽於情識逐物者滯於多識究也不失之支離
則失之記問王文成公有憂焉矯飾歸良直述孟子之言曰
人之所不慮而知者其良知也蓋所以翼獨知之訓而不使
之流於識也其徒不察而認知作主未窺天則率稱良知究
也猖狂自恣剖決藩籬不流於禪那則流於放蕩李先生有
憂焉指良歸宗而教之曰知非體也必有所以爲之體者止
爲宗修身爲本蓋所以翼良知之訓而不使之流於蕩也如
以其詞則分堂析戶鼎立爲三究其意指又同條共貫概二
爲一而二先生者同寓茲山雖閩楚吳越殊方宋明異時其
有功於吾道均也嗟乎文公當宋叔季立朝不四十年心

誠意竟爲人主所厭文成雖豎殊勳錫高爵平縛濼成後足
不得入長安行道之難如此今海氛甚惡屬國未救先生昔
自淮南借箸廟灣已握兵粵滇禽倭廉池拓地孟養蓋肉試
之莫邪起瘠之靈樞也天如欲平治天下耶則不宜令先生
老此山房矣

星渚渡 在後溪自山中往星村由此渡亦稱星村渡渡頭有
亭曰茶亭此地舊有橋曰星村橋爲洪水所推今猶呼橋頭
和陽道院 溪水分而復合中環爲洲平行可數里林木蔚然
內有道院故址初爲元道士彭日隆建續有某天師者名之
曰清微太和宮規模宏麗爲冲佑之亞中有寥陽殿 道紀
堂 清虛堂 凝雲閣 宜晚亭 雲堂 齋堂 太音閣

朝元閣其前為都宮門虞文靖公集有記永樂十四年為洪水所漂今洲呼為道院洲

記 清微太和宮記

元虞 集

神仙家擇地以自居據高險則乏寬平就夷曠則多緩弱故陶隱居之流著登真之訣以得地為急務也武夷之山其水九田層林疊嶺攢竒累秀跬步轉移萬態億狀引舟濯纓清徹心骨精神之聚特在十餘里之間東際天柱而上溯迴從之而桑麻平川九曲盡矣清微太和宮在焉始建宮者彭君隱空也隱空有道術為人所歸行省泰政魏天祐僉憲張天翼府判毋逢辰尤所尊禮其同學門人子弟多材智足以有餘以成其名得詹氏程氏范氏支氏發其私財以相隱空之

作室也良材巨木在上流山谷中水多灣磯久莫能致一夕

大雷雨乘流而至殆神助焉乃作寥陽之殿又有佗殿以奉

元帝武夷十三仙有修廡洞房以祠群仙有兩閣以棲鐘鼓

左曰大音右曰朝元有道紀之堂以宣法要有清虛之堂以

居主者有雲堂以容衆有齋堂以會食庖庫衆物之藏賓客

往來之館莫不具備有都宮之門以謹出入謂之和陽道院

嗣漢一十八代天師更署曰清微太和宮美其構而大其名

也經始於至元戊子至延祐庚申而成功又五年而隱空歿

則泰定甲子之三月也棺而斂之瘞諸宮側宮中道士甲乙

相傳各以別之以元洞太乙正道常存為次後十八年屬予

作文以記之者則住持提點彭洞源焚修提點詹洞中提舉

羅洞文副官江洞德知事江洞淵皆隱空之再傳也奉書以
來者羅洞文覃懷人也幼來茲山今老矣按武夷山圖指其
地以見示慨然文公先生之舊游而知隱空作宮得其所也
隱空諱曰隆崇安人洞文言隱空蓋彭祖之後云予聞而駭
然則出昔人白君玉蟾止止庵記以相示蓋云彭祖者錢鏐
也卽所謂商賢大夫老彭得封彭城故曰彭有子曰武曰夷
既而來隱此山是以名武夷之山徵信於古書時代遐漠草
得其說且云彭祖七百七十七歲而終惟武與夷幾歲時所
生子也其必有所稽乎或云隱空少竒俊稍長學仙能飛步
武夷諸峯不擇危險人望之以爲仙今武夷山中玉蟾所記
有晉人婁卬鍾唐人薛邴宋人李陶真李鐵笛李磨鏡等求

其遺跡於山石間不得其彷彿所謂止止庵者蓋被荆榛數
日而後得其遺址里人詹玘夫爲營構之玉蟾不能久居而
去大隱屏之巔仙都道士趙嗣祖亦常結庵其上謂之天遊
道院趙君吾故人也後遊京師濡跡塵間不復能歸然則隱
空太和之作能叛大而持久甚不可以無記也故爲之記
題識曰 舊志云在九曲溪頭晉郭璞畱識云黃岡降勢走
飛龍鬱鬱蒼蒼氣像雄兩水護田歸洞府諸峯羅烈擁神宮
林中猛虎橫安跡天外狡貍對面崇玉佩霞衣千百衆萬年
仙境似崆峒後石隕於水 明楊恒叔曰晉時未有近體必
後人所作然此石已隕於水今不存

溪南

幃巖 在八曲廩石之左橫亘數百尋四周陡壁狀如垂幃
頂平曠無林木土人藝茶其上俗呼幃頂茶殊佳近巖有灘
曰淺灘

路徑一從霞斐洲右循山峽踰小嶺登其巔一從四曲更
衣臺後亦可至

仙巖 在幃巖左岩半有碧雲庵前有石極高峭名飛來石
石上建小亭曰香亭亦稱禱雨亭

路徑一從霞斐洲右踰小嶺涉仙巖一從更衣臺後踰小
嶺循雲岩左越仙岩之背至碧雲庵徑絕險一從平林渡

頭踰山均循晚對峯背亦及仙岩

雲岩 在仙岩左其東北距四曲李仙岩不遠上有石室可

容百人名雲岩洞相傳昔為巨蟒所踞有詹法師者驅之仍
翔庵曰雲岩庵今廢

路徑自更衣臺後南行約三里可達其嶺

詩 雲巖

明鄭主忠

巨蟒驅教出石門縑流從此習雷文誰知今日遊人到只見
空岩鎖白雲

又

王鵬

山如屏水如玉石洞欹欹倚溪曲雲來逼青霄雲去見岩麓
萬里天風吹不斷白衣蒼狗空中逐高人何事抱雲眠為刷
雲根結茅屋

儒林祠 在九曲溪盡處元末崇安詹天麟建與清江杜本

讀書其中又平川有天麟萬卷書樓及杜本舊居稱聘君宅
有思學齋懷友軒後本之孫圻仍居其地建思紹堂又山南
有靜可書堂宋隱士詹琦建今皆廢

記 靜可書堂記

宋徐幾

予愛武夷佳山水且有佳友晚歲徙居焉詹兄琦景韓久從
予遊知其爲人孝弟忠信天資近道聞詩書仁義之名言躍
如也一日語予曰某愛程子云性靜可以爲學因各讀書之
室曰靜可惟吾子一言以發之是爲幸予因進而語之曰學
者之於道能於其性之所近以求從人之門於道可至予性
靜有志於學誰曰不可今夫利欲闢進躁競馳逐者去道日
遠苟能收斂此心鞭逼向裏勿爲外物所動則其本立矣故

濂溪明道二先生發明爲學之要必言靜者以大本所當先
也然伊川先生教人又用敬不用靜者以敬貫動靜該體用
若只用靜恐都無事了又失大本當先之意故曰敬則自虛
靜又曰靜中須有物始得必如是乃可言靜雖然靜謂之可
者亦僅可而有所未盡之辭程伯子之云且以開學者從
入之門耳會其歸要其至則動靜無端陰陽無始聖人之於
天道脗合無間然也大學之經曰知止而后有定定而后能
靜靜而后能安安而后能慮慮而后能得此古昔聖賢道
相得之要旨請以主敬窮理爲吾子勉他時隱屏有人曰靜
可學者顧不羨美歟

思學齋記

元虞集

予如識臨江杜伯原甫於京師也見其博識多聞心愛重之
間從之有問焉沛乎其應之無窮也凡天文地理律歷名數
神仙浮屠之說徃七得諸世外之士至於因人情時物之變
以議論政治之術可指諸掌時大臣有得其才而薦用於上
未命而大臣者卒事報聞原甫漠不介意方就客舍取詩書
易春秋悉去其傳注而繕書之慨然有直求聖賢之意於簡
冊之遺未幾去隱於武夷山中其友詹景仁爰力資之乃
得肆志於所願學而予不及從之矣延祐庚申予居憂在臨
川原甫使人來告曰我著書究皇極經世之旨子其來其講
焉且曰我以思學名齋居舊矣子爲我記之明年予免喪省
墓於吳中將湖浙踰嶠一就其約會有召命不果又四年景

一乘京師每以思學之記爲說余曰原甫高邁絕俗閑居山
林無世事之奪其所就殆必過人遠甚余何足以言之余苟
言之人之所知耳所不知者固不能言也他日見原甫授說
而執筆焉猶未晚也景仁曰不可必有以復諸原甫乃試誦
所聞焉古之所謂學者非他學也心學而矣然其要也不出
於仁義禮智之固有其見諸物雖極萬變亦未有出乎父子
夫婦君臣長幼朋友之外者也故曰聖人者人倫之至而已
聖人至而我未至故必學焉求其所以至則必思焉且何以
知聖人哉於其言行而已耳言其言也行其行也然而反諸
心而有未盡行諸已而有未得是以有思固非茫然無所於
主而妄馳者也有爲之說者乃欲絕去倫理措心如墻壁以

待夫忽然之悟於一觸之覺不亦殆乎今夫有事於思者如火之始然而烟鬱之泉之始達而泥汨之草木之始生土石以軌之逮其發也其畜固已艱矣故非高明之資有未易以遽徹者也嘗聞之明睿所照與考索以至者不同夫明睿則無所事乎思矣無思則幾乎聖人矣其始乃在於完養而涵泳焉時至而化有非在我者不亦盛哉請以是質諸原甫苟自取焉則因以爲記

懷友軒記

杜本

予少時喜遊名山川聞武夷最勝而最遠常按圖指畫擊几爲節咏九曲權歌想昔人之餘韻謂不得遂其願慕之心矣皇慶初元以御史大夫木公薦在京師獲托姓名於四方之

士于時張君伯起以童子科校書秘省景仁詹君亦辟椽三公府暇輒相從以問學切嗟爲事景仁廼世家武夷嘗極道其谿山高深環合千態萬狀有終身不得窮其趣者焉而先世有田數十區有書數百卷足爲宵友之具以徜徉乎其間得無有意於斯乎予聞識之他祐間景仁出武浙東憲幕伯起亦佐郡三山余以微言忤執事之出書不報而去乃能挾册山中償夙所願者蓋二君之力也雖欲結茅溪澗而山石犖确自非仙人道士餐霞茹芝乘風馭氣者罕得居之溪沂流而至星村則開廊平行有詹氏之故居然輿市井相濬綜又沂流而爲建峯皆良田水竹有類嵩邨鄠穀之間稍憩息南湖之屨堂始遇一儒者與叙語欣然若故人周行未五里

許平川廓然問之百年榛莽矣自九曲至是僅半舍而遊者已罕至然水益深緩山益磅礴其西南諸峯峻出霄漢其最峭拔者爲雲巖雲氣起伏其下鄉人於此候雨暘焉天高氣肅時一登望間江之左右浙之東西三山海日七閩烟靄皆隱約於指顧間武夷諸峯並烈其下巖巒林壑澗谷淵渚泉池潭洞層見叠出不可致詰無不稱觀者焉余顧而樂之景仁遂贖其榛莽之墟剷蕪而藝植之擬卜居而未暇乃即其東偏先構堂室携妻與子讀書其中而予之寓舍又得蒔地而蕃之植兩楹爲軒戶牖簡樸藏修遊息在焉然每一俯仰之際輒思平生所與交者皆海內名士或道德之高深或文章之雒雅或政事之明達或翰墨之神竒或節操之堅峻

或信義之昭白或談論之流綜或考覈之精密或出處之慎重或神情之閔曠乃皆在於神京大府湖江之外不得相觀以成其志寧不有所思耶尚幸舊有藏書朝夕披玩蓋六經載聖人之道與夫百家子史所錄開極以來明聖之君昏暴之主忠良孝義貞節之士酷虐貪穢之吏是非善惡之跡以及天官地志禮樂制度律歷名數龜筮醫方營繕種藝方言野錄仙佛變化之事附以崖鐫野刻塔寺宮廟彙鼎柱石井臼墟墓詭異之辭悉次於是庶開卷而有得亦可謂益者之友則雖親舊之交遠江海之迹疏然神會於文字之間猶能友於千古况同一寰宇而並世者哉因輯其詞翰列氏名而記之其出處存歿雖異然予之所慕者不在於斯也

思紹堂記

明張智

爲人後者惟善於繼述斯有足稱也夫前人擅一代名後之人苟不能有以繼述之世業衰矣繼述之道奈何亦惟備身勤行進問學而致思聖道行遠自邇紹續世休豈有不至者哉契家杜德基氏是所謂有足稱者德基幼孤鞠於母氏稚齡向學即知慕其先大父清碧翁蓋翁學貫天人隱居武夷道德才藝爲時公卿所景仰當有元之世君臣延攬旁求遺逸遣使以翰林次對召比至再三翁方勉強出至武林旋移疾還山嘗復丞相書有以萬事合爲一理以萬民合爲一心以千載合爲一日以四海合爲一家則可言制禮作樂而躋二帝三王之盛其辭微矣暮年逍遙九曲高風清節直追嚴

周輩流風餘韻逮今猶存爲子孫者得不有興起者哉德基弱冠至有立取友求師考德問業矻七窮年歲出所以紹續先業亦勤矣所居揭堂以思紹其爲人之賢可知邇以旣寧邑司訓起復赴天官遷永嘉郡學誥余成均出公卿大夫文章滿卷予受讀之其爲思紹之義至矣尚欲予一言卷左予何言哉清碧翁之名聞著於昔者傳於今德基以順而立矣予何言哉雖然傳有曰思則得之又曰思貽父母令名必果則是學行皆當致乎思乃克有成頽何人哉希之則是弗思詎能致之乎夫惟克思紹則遂矣翁旣委祉於前爲孫子克紹於後權輿由德基而未涯是固晝夜當勉旃予先君文墓及與翁交誼爲極深弱齡以通家子獲翁耳提面命之

誨俯仰俟五十年餘九原不可作感慨係之矣德基別數年
得遂簪盍之會智亦惟以明堂之義爲之勉尚看亢大其宗
也詩曰無念爾祖聿修厥德庸書以識歲月永樂元年三月
旣望在夔倫堂書

詩

贈杜清碧

元薩天錫

夜宿武夷山乃識清碧叟清談道人同險語山鬼走出門視
河漢危梯掛星斗白露溥芙蓉清寒夜深久

又

范梈

微君家住武夷山白鶴元猿夜扣關船泛清冷凡九曲屋分
丹碧只三間世人往往知名姓仙子時時定品班孔璧秦灰
天未喪幾多魚豕待重刪

過杜清碧讀書處

明邱雲霄

微君何事隱崔嵬亂世冠裳共草萊碧嶂清江愁暮雨寒花
落葉漫荒臺石几半留苔欲沒庭松已老鶴還來白雲不斷
空流水芳桂叢深春鳥哀

過杜清碧故宅

傅汝舟

不見平川杜伯原社烟春靄自朝昏藏書小閣猶相望避世
微言竟莫存拂意冠裳委草莽怡情山水付兒孫清江碧嶂
高峯在夜雨寒燈獨掩門

又

藍仁

荒徑頽垣蔓草區眼中人世古今殊朱門五馬先朝貴白屋
三徵此日無松竹不堪論舊事山林何處託潛夫月明誰唱

滄浪曲欲問漁舟不可呼

又

藍智

濟時共惜卧龍才三詔頻煩顧草萊宅近青山惟廢址書藏
壞壁有殘灰當年奏稿何人見落日寒鴉其客來世事推移
遺老遠松風澗水有餘哀

又

羽士江一源

幽探遠吊杜微君衰草淒涼怨夕曛謾憶儒林開館問空雷
清碧刻詩又巖花半落名難辨野蔓斜侵路莫分獨對蒼山
搖落處蕭蕭千樹鎖寒雲

思紹堂

胡庶

清江杜微君高節天下聞脫屣視簪紱富貴薄浮雲棲迹武

夷山著述搜元文究極陰陽蹟探窮造化相上以明義畫次

第及典墳尊王抑伯術欲界仁義敦剖析康節微性命及本

原辨志尚千古懷友敞幽軒超然萬物表鸞鶴騰孤騫斯人

既已遠遺芳有餘芬世澤固不泯傳家見諸孫華堂揭思紹

仰止恒著存盛德必悠久所以隆其昆勗哉嗣續者肅慎承

清門

思學齋

元王七熙

武夷山色清於水君築高齋第幾峯北苑鶯啼春煮茗西風

鶴語夜巢松田家送酒芝香瀉道士留書石髓封聞說牙籤三

萬軸欲憑南雁約相從

霞斐洲 又名霞洲俗名蝦尾洲仙巖之前泊於溪畔烟扉

水確曲屋小橋村居數家殊有逸致溯溪過此距星村不遠
焉 國朝烈婦丁氏畫節處外有洲名蜈蚣鈴

獅子林 在霞斐洲上康熙三十一年建陽僧超瑋與其徒
如膽結庵於此

路徑自一曲藍巖石門出經蜈蚣鈴至此不遠

江墩溪 在霞斐洲左自黎源左渠排屯諸村流二十餘里

經江墩橋 亦名霞斐橋 入九曲渡橋而西則星村也

齊雲峯 近星村高插霄漢靜夜時常見天燈上有齊雲亭

下有 齊云庵 聖者庵

詩 卷句 元鄭德普

石潤黏蒼薛開高流白雲

出九曲

國朝程 湄

溪源探盡見平川禾黍油七萬傾田到此莫嫌山漸少齊雲
峯勢欲摩天

按表志徐志俱載毛竹洞在靈峯右又有挨人石在洞外
行者側身而過石或搖動若挨人然王志謂到地覓之不
可得詢張太嶼引到一曲山南鷓子巖南載入一曲從之

然挨人石覓之竟不可得附志于此岩石刻字

寒岩刻 寒岩 嘉靖癸巳致齋題

石鱗窟刻 隱元岩 萬曆癸丑夏吳鴻宇書

武夷山志卷之十四終



山北圖說

九曲諸峯與水沿緣映帶已隨各曲分列井然其溪北幽巖邃谷與曲水隔遠者尙多舊志分載各曲不惟形勢乖離不相聯屬抑且逕路不清令人茫昧茲統彙爲山北所謂方以類聚也其逕又復註明凡有三支亦如曲中之山分溪南北脈絡分明俾遊人按籍而稽庶可得其真也

武夷山志卷之十五

武夷董天工與齋編集男勸校刊

山北

東徑 自一曲溪北蘭湯渡登陸西北行諸山有稍折而東南者皆附入以幹爲主則支應從之

排峯巖 一名屏風岩又名靈龕一曲三姑石北壁立千尺方正如屏四無徑路編梯以登其上平曠可以畢覽勝槩換骨岩三姑石皆依附幔亭後三姑石以北則溪壑深峻不相屬矣故山北志斷自排峯巖

石鱗窩 亦稱石鱗岩在排峯巖後其左近有石無名邑隱

士邱四可有記

記 石鱗岩左右

明邱四可

左出石鱗岩三十餘步得平岡倚接絕壁竹疎而木與間岼然有石不自地生者方廣一丈五尺頂可以手探斜仄成致雖卑小而高大之勢備兩小樹幹生光巔而根穿石穴扶疎而婉折邊生猗蘭馥郁鹵暢側木大幾把枝葉都秀有子實如珠者數百紅潤圓映莫得其名玩而不敢食背則以裂鴛異小竹一行間其裂而出纖劔細玉隋風擊戛佳致尤不易形茲石也隣於郡邑之間寶貴不可言今而岑寂窮谷美刀見負悲夫獨一石也與哉

白雲莊 排峯岩北四面皆高巖峻壁有石門通小逕半里

許中復平曠舊有道院今惟遺址石臺丹井猶存又名白雲深處左近有道者石二石比肩相倚而立舊志謂如寒山拾得狀俗名和合巖

詩 白雲深處

明劉孔敦

再入烟霞第幾重白雲隱隱罩山峯低徊忘却歸來路惟聽樵歌伴晚鐘

又

鄭啟謨

矯首峯頭雲氣陰紅塵不到此幽深高人會得長生訣玉蕊琪花滿樹林

北斗峯 在三姑石後七峯相連狀如北斗

詩

北斗峯

明屠隆

山是仙人禮斗壇遂令山作斗形看身中沆瀣九霞珮頭上
芙蓉七葉冠挹取天孫河水澗酌來帝女王漿塞道人原自
台星謫撫景傷心淚泛瀾

梅岩 在北斗峰西北五里許土人呼爲外馬頭

國朝僧超學結庵於此

馬頭岩 在梅岩南一名磊石岩五石駢列勢若騰驤俗稱

五 奔槽 國朝僧如修構室居之僧遜樵重建名磊石庵

岩比一帶名蓑衣林岩南曰茶林

詩

馬頭岩

明徐表然

怪石崢嶸似馬頭巍然不動幾千秋
莓苔深鎖疑毛長霧雨常蒸若汗流
金勒午拋芳草逕玉鞭春落綠楊溝
曾消西北

風塵警歸卧華陽得自由

磊石庵

國朝龔錫昌

從來勝地結衡茅鳥語花香可訂交
樓竹清高憑石磊堂開宏敞鎮山坳
白雲近午飛巖頂明月深更掛樹梢
燕子不知新煥彩猶尋棟上舊時巢

凝雲庵 馬頭巖下亦稱凝庵從換骨岩紆曲以入中復夷

曠茂林修竹掩映左右桃杏梅桂次第迭開隆慶初道士張
德思建內有凝雲閣息機窩鳴球亭湧翠臺又從岩巔濬飛

泉注蓮池由水流觴以娛客有巨石如几可奕棋勒橘隱一
字各橘隱石景物佳勝人謂之小蓬萊今廢

詩

遊凝雲菴

明吳立中

一逕桃花繞竹林石樓高結萬山陰人間自有桃源路不用
漁郎別處尋 此詩刻於馬頭巖石壁

壽疑菴張道人

邱雲霄

重到仙臺古千峯紫氣浮菴丹龍伏鬲緝羽鶴供裘鹿遇尋
常逕鷄鳴十二樓逡巡醒復醉歌舞未曾休

馬頭巖石室懷張鍊師

謝肇淛

石室尚巖隈松門鎖不開仙遺蟬蛻去人問馬頭來草沒階
前地牀滋雨後苔丹臺雙白鶴遙逐紫雲迴

碧桃園 亦在馬頭岩下萬歷間楚人周道一築今廢

馬鞍岩 在馬頭巖西南巨石壁立形肖馬鞍相傳昔有毛
女結廬其上又名毛廬峯

鐵郎寨 在馬頭岩南群峯環遶中有田十餘畝相傳昔有

山寇屯三姑市忽見旗幟自山中出遂駭遁避亂於此者亦
聞金戈鐵馬之聲謂有神兵夾護因建屋以祀山神故名

路徑自此向南至天遊約五里許踰一小嶺即天遊壠也

詩

由馬頭岩鐵郎寨至天遊峯

國朝王梓

兩山真欲合鑿白梁危橋穿罅春風轉登車曉霧消松聲起
澎湃日色上岩巖覽勝塵氛遠開顏近碧霄

碌金岩 任鐵郎寨西北岩壑幽深萬歷間道人周千秋廬
其上

友人過訪山中詩以送之

周千秋

森森灌木欲摩霄薜荔成陰壓斷橋有客徘徊尋石齒逢人

指點轉山腰到來戀我溪岩靜別去愁他道路遙試向萬峯
高處看穿雲雙屐下迢迢

碌金巖訪一邱老

明張蚩蚩

碌七人間世冥鴻却羨君竹光浮午夢松韻入南薰大巧還
天地幽棲白水雲偶來因問字清幅可容分

桐栢窠 負馬頭岩向杜葛寨四維峯環俯臨巨壑赤石街
橋在望歷歷鴈齒可數

國朝僧衍操舫庵居之新名栢峯又曰鳳林

栢峯訪僧松山

國朝王梓

穿林躡磴到禪關萬疊危峯四面環靄上慈雲生法界霏
花雨落人間忘機漸覺輕鷗近避世真同野鶴閑有約來時

來訪勝依稀曲水響潺湲

杜葛岩 在栢桐窠北其巔可遠眺城市相傳昔有杜氏葛

氏隱此山隈壘石爲門入逕絕幽又傳爲姓杜名葛者嘗糾

鄉兵於此以禦山寇亦名杜其寨由石門進不數武懸崖嵌

空風雨不侵乃高直燕集之都曰會仙洞是爲下洞由茲登

躡石磴盤折鳥道縈紆名曰小有洞是爲上洞萬曆初道人

程常靜建曰仙亭于此因石爲龕以安仙像又建會仙樓三

間以祀玉皇諸仙又傍爲雲水樓、傍夾蝸爲靜園室其炊

餐處鐫曰飛霞巖同時浦城吳司丞中立隱此勒景陽洞天

四字於巖壁易爲爲轄曰杜轄巖謂路逕幽曲杜絕車轄也

一扁其庵曰養恬庵爲之記明末邑人邱四可棄諸生而隱亦

居于此岩背有萬筵時草鞋仙嘗結小屋以居今遺蛻猶存
藏真島 在杜葛岩翠然聯亘巔峯怪石不可數計

觀化臺 在杜葛岩萬歷間豫章劉良任崇安廣文時構
其左近有岩曰魚巖

香鑪峯 丈人峯 俱近杜葛岩

記 養恬庵記

明吳中立

武夷山之九曲溪流入崇安大溪溯流而上五里許有杜轄
巖焉岩壁週遭若城郭局固邃密僅啟一竇不容車馬往來
故稱杜轄上下凡二洞初由石門進不數武懸崖千仞風雨
不侵是為下洞曰會仙由茲躡石磴而上竹樹交陰流泉汪
汪截然蔓峙為飛霞岩巖然聯亘為藏真島巔峯怪石若蹲

若踞若翔若舞曾不可以數計皆環繞於襟袍間是為上洞
曰小有下洞平行而深藏上洞峻絕而軒朗一山之中舒歛
潛見固異狀也予夙耽山水棲遲九曲之濱思支片茅以終
隱頹武夷名勝甲天下宦轍經遊絡繹不絕非息機遐遁之
區晉試之其必有大噤無名為洞天之別業者哉已卯避
逅道人程始陽常靜相携入杜轄巖夷猶周睇不覺油然解
頤曰有是哉太樸猶完鴻濛未鑿含輝匿景以待圖之求
其茲山之謂乎余與子有歸老之地矣遂度材而鳩工覆岩
為宇甃水為渠本自化工參以人力建會仙樓於下洞樓之
下為屋三間中奉神明旁棲雲水建出仙亭于上洞因石為
龕以安仙像幔亭峯列屏於後香爐峯卓案於前烟靄繽紛

聖燈閃爍殆天然香火也復夾以蝸室名爲靜園而亭之左
腋爲草樓爲飛閣可以坐隱可以卧遊亭之右逕有石几登
石棋碁沿迴岩穴間輒有青蒹綠蒲堪以憇息東旭西暉以
賓以祖俯挹丈人峯桃花萬樹醺然如對赤城徜徉其際飄
七然羽化登仙矣飛霞岩側滌炊具別爲朝餐所不欲近烟
火氣也白雲深處設重關別三洞也始事於萬歷己卯夏落
成于庚辰之冬凡所營構胥自始陽道力伯夷之徒所築固
宜爲清修者之淨居也古德云境靜心閑乃可入道余爰處
以來塵累日消恬淡日就頤神以境養之時義大矣哉遂冠
之曰養恬庵書而記之

杜轄岩訪吳公度

明張元忭

詩

杜轄巖中人曲江舊同席未折彭澤腰早着東山屐栖心老
氏書結廬武夷側晴峯萬點青雲溪幾條白元關夾長松丹
房架危壁岩頭露可餐岩下芝可摘猿鶴時爲群車馬杳難
即我本邛笮人聊作金門客烟霞夙同好出處偶殊迹諦觀
聲利場何似神仙宅四十已無聞百年亦瞬息徒然亦松子
巢居鍊形魄明發出閩嶺題詩訂泉石

杜轄岩遇鄉人程道士石上小酌

吳棫

懸裝已際曉岡嶺亂鳴鷗企石望宿處褰露明朝暎能岩結
木末蛇谷盤山根天勢側崖勢石竅開洞門危柯似振魄崩
壁欲摧轅懷止即沈響非去亦延魂頗諳冲漠理偶與道人
論旣賞虛無說復欣鄉曲言山簌香死厨清醕坐開尊澗島

啼松磴藤花落槿藩欵別意但寂次途情彌敦山中何所瞻
為我摘蘭蓀

杜轄岩

謝肇淛

路出諸峯外門開流水邊數椽栖洞屋一帶隔溪烟雨漲
頭瀑泉滋石罅田蕭然車馬絕鷄犬亦成仙

盤珠岩 在杜葛巖左其石若盤上有圓石如珠因名康熙
五十九年僧竺民新創有庵岩右有洞內大確一口傳前七
夕時在河洗確大風吹入洞內又名雲壘岩

象鼻巖

在杜葛巖西北其巔有石下垂若象鼻然

天心峯 在碌金岩北里許以全山百二十里度之是峯

其中央猶天之樞極也故名天心其下有山心永樂庵嘉靖

七年道士韓洞虛里起改名天心庵今廢峯下平衍數里曰

葛香林禾黍環匝竹樹森列望之蔚然猶濠濮間云

詩

宿天心永樂庵

明傅汝舟

胡登三仰峯反宿天心庵久入名山遊蹊逕頗盡諳始知九
曲外又有南山南森邃更險豁深篁倚烟嵐汝田稻翼七巖
桂花璠七疎籬隔雞犬朽樹藏蜂蠶嘗傳武陵源旁有捕魚
潭伐木不到遠却苗松與楠雲光卸杖屢回首望石龕經旬
四攀眺偃息此日堪澗芹食轉美草榻卧正酣枕中有鴻寶
何必問周鼎

天心庵

僧淨叅

天心寂七總無私秋老寒深草木衰採藥客來新雨後抱琴

僧到落花時烟消碧漢山容淡石倒青松日影移塵世浮生
終是寄杞人憂甚竟何為

紫嶺 在天心峯北亦稱紫嶺峯

火焰峯 紫嶺北峭拔騰空勢如火焰峯下有還元庵明萬
歷時建今廢峯頂有庵天啟初釋慧明從南海來結茅於此
不下山者四十餘年卒後僧悟空住持由水簾洞外澗谷入
有逕可陟其巔

詩

雨霽登火焰峯

童希睿

朝起喜空霽明霞昭眼前飛蜂穿葉裏斜羽縱雲邊曲水淨
成鏡高巖細酒泉眼空萬綠處賞勝問何先
師陀峯 火礮峯東有石門如箭括曰雲門有飛瀑瀉下曰

流雲澗漸遠又名襲芳澗亦赴流香澗匯流而東

丹霞嶂 火焰峰北雄峙如城綿亘層疊長數萬丈而高稱
之石色頽紫宛然天半朱霞

水簾洞 丹霞嶂北一名唐曜洞天石壁廣數十丈高稱之
斜覆為厂中構祠觀數處不施陶瓦風雨不侵巖頂有水曰
珠泉自上瀉下隨風飄灑狀如珠簾注于池山中最勝之境
也 自縣出城南行二十里即達不煩經歷諸峯矣

陶穀清異錄載武夷山有石如立壁巔隱一泉分七派山
僧顛堅名為七絃水按山中今無此水名諸志亦絕無敢
者以狀考之疑即水簾之舊名也

記 水簾洞記

明楊應紹

予自乙卯來武夷思欲作天遊精舍於天遊觀上天遊去水
簾不十餘里余竟不能至歲己未夏四月安城東廊鄉師同
劉獅泉及子美諸子自懷玉天真至自武夷次天遊有詩懷
予又折簡約邵公吾南劉子偕會泊予至廊翁自天遊游衍
已出憇冲佑宮矣次晨與諸子相傍徨九曲溪上宴酌又次
晨約同遊水簾水簾在武夷西乃沿武夷逆溪而上數十折
始達其麓過小石澗予行後諸子獨肩輿入自水簾山口迤
邐委蛇與石巖上下兩崖間踟促不可步有石板嶂百餘
仞側立大畔予錯履其下則見天光隱隱一線頃又西折循
石棧石級而上忽巖嵐斗裂旋如兩墻堵然予乃婆娑青松
頂東望遙睇岩外隔雲烟火數家恍若武陵桃源咫尺至則

見廊師與獅泉吾南諸子談欵久之坐佛寮迤蔓臺過飲唐
曙洞天所予跋蹠亦就飲泉光野色還予百億狀忽凜如化
國神準自夢中而下坐久仰睇俯眺不能悉但見懸崖萬仞
瀑水自天飛墮日光倒射錯閃如散珠然簾揭于前旁有題
曰龍湫飛來處予興劇頻徕徠烟靄窟中岩背霧濛然起
籠罩人飛流噴沫數十里朝昏莫辨予且駭且盼廊翁顧謂
予曰有本者如是人之學也亦然無源之水不能久存長逝
無根之學不能大受遠到人之性直靈源是豈可不疏濬培
壅也余唯唯復與廊翁自斗岸下水簾側左右有兩石穴深
不可窺睨水簾水瀉下鍾為深淵綠沉如育神物蟠護然
灣洑自小石橋出復散為平沼方池下有堤曠儻旁綠陰

掩映毛竹數十株而挺如人立予與廓翁諸子徘徊徙倚不能去復取觴立飲豪歌數闕尋清風颯颯自兩崖下不知天壤間風雲浴沂之樂何以加此水簾忘予亦忘水簾或曰是水生於山谷荒壤無所用徒為好事供玩之具或曰是雖無用然其光瑩洞徹可鑑物為賢者容與為山川萬古偉觀與夫雁蕩龍湫齊名無窮則其於世亦不可謂無所用也豈徒取呂梁濠上丈人荒唐者之嘯弄已乎是似類造物神巧所施設誠有不偶然者夫水知者所樂余非知者也獨來遊有感于夫子川上之觀則有不能已於言者作水簾洞記

詩 水簾洞

明樊獻科

絕壁飛泉挂白龍一簾風送玉玲瓏聲傳空谷晴疑雨勢轉

丹崖淡復濃噴月垂七播碧漢沉雲冉七散芙蓉尊前誰作高山調拂袖吾從問赤松

又

黃廷

峯頭今古洒淋漓萬類千絲散又齊羸女去垂紗幕冷天孫下織玉梭低輕雲濕擾蝦鬚亂薄霧塞籠翡翠迷惆悵卷舒人不至黃昏山鳥隔烟啼

又

夏朝甫

天公幻化直奇絕派下銀河作晴雪一道光分出洞天粲七珠簾掛瓊闕青娥乘鸞去不歸綵雲香霧遺綉衣懸空倒瀉千餘尺風雷五夜鬼神悲

又

朱璣

石泉飛雨亂淋漓翠箔銀絲萬縷齊雲屋潤含蛛網密月鈎
涼沁玉繩低鮫人夜織啼痕濕湘女晨粧望眼迷恍似水晶
宮殿裏四簷花雨亂鸞啼

又

江騰鱗

瑤天機縷挂層城一片湘波別樣清應愛水雲歸隱逸不妨
猿鶴結詩盟垂七檻外寒星落洒七窓前夜雨鳴最是紅塵
飛不入疎簾掩映月鈎橫

又

楊成各

石壁谿舂過鳥稀探竒還叩白雲扉半簷晴雨雙虹裊千派
寒流匹練飛日射遺珠光入座風搖亂雪冷侵衣分明倒瀉
銀河水不斷濕溪響翠微

又

蔣希温

寒溜霏七漱玉萃洞門無鎖暮雲遮時空難捲一簾雨寒雪
長飛六月花壁上苔痕知禹鑿井中神氣應丹砂浮生久爲
微塵縛欲借山房作住家

又

顧大典

白雲遮隔半青山坐挹飛泉六月寒天上樓臺出窈宇洞中
日月異人間珠簾匝地誰爲捲金鎖長門迥不關五嶽徧遊
歸此地碧桃花底究元丹

又

張于壘

沿澗覓丹邱峯巒饒飽取散屐步石門古洞臨靜渚清音只
一偶松篁振其緒忽訝晴日中翻作半山雨雪霰何自來霏

七滌炎暑已乃化為烟孤飛無處所疑碎萬斛珠巧向簾前
注此理竟何如中有不空語樵者徐報言飛瀑空中吐水源
高且遠忽遇巖傾處千仞瀉層崖冷七清洞俯向東復向西
乍仰時乍俯分合不自持倩風為之主似喜游人來踟躕而
欲舞須臾急雨過風狂泉必怒變幻轉多姿聲光增幾許雨
脚不敢混清濁故殊侶咸歸幽寂中宜與靜者伍余也識其
直倚檻徒延佇安得凌白雲隨泉其輕舉

吳 拭

終古積層岑千丈懸疊草匪鑿源自通不激地能浪巖巖洞
如龕巖、峯似嶂綿濛簷溜急濺沫皎珠漾潛壑欲歇微入
林雷雨社日射光五色風吹縷萬狀皆楹靜懶聽步苔迥逾

望餘氣紛滋花薄寒思御續誰告離山心惜未窮其上

又

鍾 惺

出山又入山原為水簾計本以水得名却有群峯衛峯立如
兩雄有時揖相避削壁外無覩水源何所自各自成思卑耻
為武夷隸觀其斷連時嘗亦一而二中劈即徑竇紆直行幽
隊天日在峽中少虧恒多蔽戴實或履虛置身有無際欣慨
交形神俯仰失天地石交榜洞生往來劣得濟倏然身世竟
孤高復幽異微雨日邊來頭數若見託看山行路人此物最
所忌遊絲與貫珠潤氣流清霽乃知是飛瀑遠從千仞墜至
芬反無喧聲光歸一細東西不自由分合果何意水風若交
蘆依倚作寒吹吁嗟水一簾蓄泄高且邃群峯卷微源起落

難思議

又

何其漁

一入清涼境全消二伏炎銀河飛作練香雨散為簾影碎流
丹鳥寒凝射玉蟾瓊宮瑤室裏疑是有鮫潛

又

安國任

飛瀑瀉遙峯飄七西復東入雲晴作雨映日晚成虹繞壁花
光濕綠岸樹影空結茅如可就常此洗塵悰

又

曹學全

天際看泉落何如削玉屏亂飛孤澗雪平散一池星鮫淚沾
衣濕龍湫掛幕腥飄然澄澈界遠映數岑青

陪吳季源司李遊水簾洞

邱雲零

窈窕回幽壑神仙別有家雲深石洞煖風轉水簾斜山羽窺
遊節林絲縮落花君行壽社稷吾合老烟霞

水簾洞用洗少汾韻

王漸達

容與步丹巘逶迤轉瑤石飛聲林杪度元韻岩端出霏微絕
嶽鳴蒼蒼暗游跡蕭然獨倚萬慮况空寂初疑雨藏山遲
想風生壁源泉與神呵淵窅洞不測臨流發長嘯徐響杳無
極凌空散羽翰逸思敞胸臆衆山何壘七俯瞰失羣挂日暮
薄言旋簾開月虛白

宿水簾洞

徐燏

絕望宵眠要未安隔峯松影月光殘簷前水落晴空雨添得
雲窻一夜寒

又

國朝僧超全

萬古空山雨終年不肯停豈知雙瀑水高映一簾青噴雪疑
藏竇因風類馮瓶境幽人跡少向夕洞門扃

又

王梓

肩輿尋勝境逼仄道途長澗水流香淡炎風出岫涼傳
源委遺蛻本荒唐到此開心目珠簾挂石梁

又

馮柱雄

石壁潺湲萬仞孤水晶宮殿轉模糊千絲不斷搖珠箔匹練
長懸瀉鏡湖泡沫獨憐仙蛻冷烟嵐無定玉鈎扶虛堂擬是
鮫人宅好事誰將佛老圖

又

倪應運

洞口烟嵐未盡開層崖能有幾人來嵯峩鳥草何如者浩瀚
龍涎有以哉千仞雲騰浩霽雪半天雨響沸晴雷閣中仙子
今何在捲珠簾隱玉頤

三教堂

水簾洞正中瀑布落其前祀至聖孔子以及老子

釋迦

國朝王復禮曰五帝三王以來惟有儒教至漢而仙佛興焉
然老子爲柱史非道士也有妻子非出家也史遷謂其一百
六十歲或云二百歲非不死也其墓在扶風郡槐里非白日
昇天也而道流書符煉汞妄認爲祖釋迦遠生西域安知其
詳據云雪山修道並無誦經持誡之事且捨身割肉四大皆
空何得求人佈施是世之釋道皆失其本來矣自漢桓帝于

濯龍宮設華蓋以祀老子釋迦至晉而其教始盛元帝東遷
三教鼎立則以外域之僧配吾聖人孔子此無忌憚之甚者
也周王建德時定制以儒為先道為次釋為後唐僧法明上
表武后勸其革命因升釋于道之上是二氏序次互為興衰
也齊王高洋勅道士皆剃髮為沙門有不從者殺四人於是
齊境無道士宋徽宗詔改佛為大覺金仙寺院為宮觀僧為
德士並許入道觀依道士法是二氏門庭互為興衰也豈若
儒教今古常明聖愚不易與天德同其悠久巍也蕩也至正
無奇至尊無對哉今水簾洞三教堂不知起于何代日聞向
來羽士住持則以老平居中涵子住持則以釋迦居中惟吾
夫子屈尊處末藝瀆已極是所望于崇邑當事諸君為之整

飭耳

清微洞真觀 水簾洞內右宋道人江成直建明嘉靖間道
人楊本空復葺修亭宇稱水簾道院直指樊獻科易名白龍
觀又增浴龍池潛龍井雙龍宇諸名內有昇真亭為浴龍
亭勒記于壁又有望仙臺一名昇仙臺嘉靖間仙人王廣坐
化於此遺蛻見存

記 白龍觀勒石記

明樊獻科

縉雲樊獻科按閩將歸去來風日清暇約大叅魯君子拱會
需黃尹肅都閩白君震遊水簾道院館于水簾之下仰視飛
泉如白龍懸注因易道院名為白龍觀也之下為浴龍池也
上為浴龍亭下亭數步許有井名潛龍井巖之下有堂名雙

龍宇以其在兩泉之間也時酒醉樂甚夜而忘歸大明嘉靖三十九年庚申四月念五日獻科記

詩

謁廣仙

玉蝶仙

扶筇攀石磴來謁廣仙子滿洞空白雲一榻瀟灑水邂逅愚翁烹茶問行止一笑暫歸去遙指清風裏

浴龍池

僧道盛

枕流漱石總無心苻帶蘋花何處尋夜靜月明風在樹坐聞泓下有龍吟

三賢祠

水簾洞內右祀宋劉屏山子翬朱晦庵熹劉嶽卿甫

陸志

國朝王梓曰劉嶽卿隱居水簾嘗招朱子來遊後世

遂並祀於此宜也若劉屏山卒于紹興丁卯朱子題名勒石

為淳熙辛丑距屏山之卒已二十年矣屏山既不讀書於此又不來訪嶽卿誠屬無謂况屏山贈嶽卿之父兼道詩有我亦與子同翱翔則是嶽卿之父執而朱子又屏山之門人三位安得並列無理極矣諸君無此祠名明季江右劉狀元同升自他處奉誨翁所書百世如見額懸之少非水簾洞故物也况五夫里屏山先生有專祠理應將牌位移去洞中只供朱劉二位始為得當而相宜也

詩

哭嶽卿

宋朱熹

會說幽棲地君家近接連欲携邀月酒同棹釣魚船遽爾悲聞笛真成嘆絕絃林猿催老淚為汝一潸然

北逕

自赤石街鷄母林一帶西南行凡諸山有稍折東

北者附入

霞濱巖 在水簾洞東北五里許巖下有庵不藉瓦甃曰霞濱庵 國朝僧悅可建

珠子洞 霞濱岩北俗呼為猪仔洞

曼陀巖 霞濱岩南有洞曰曼陀洞有僧寮 國朝施其恂

築室隱居于此

白花巖 霞濱巖西北一岩橫亘數十丈石壁潔白一名雪

花岩下有玉華洞土人呼為蝙蝠洞 國朝僧圓中結茅其

下近石有繞雲亭

詩

玉華洞

明傅汝舟

碧土岩前一洞天春風歲歲起雲烟崇真瑤館今猶在誰解

參同說太元

雞林 俗稱雞母林白花岩左

猶龍道院 白花岩東萬壑開道士汪清慧建今廢

詩

九月登百花岩同張南虛彭石堂范浯州

明邱雲

石磴交迷紅葉亂牧童遙背碧花叢
松不受風萬井平依千嶂落
峯寒入翠雲重登臨不盡茶

莫醉漫引青藜東復東

葫蘆石 白花岩北以形得名

鷹嘴岩 葫蘆石西北聳峭高巖頂復尖曲宛如鷹嘴

劉官寨 鷹嘴岩西北宋劉兼道衡嶽卿甫父子集義兵於

此禦寇土人德之因各石關石垣猶存

龍頭洞 劉官寨北洞中 國朝邑士裴光緒建有潛龍樓

鳳窠 龍頭洞前 國朝龍溪居士邱元遂建有棲鳳樓

白崖 龍頭洞北石壁皚白長數十丈其麓為梅花莊宋高

士趙必漣弟進士若樾全隱處 自此南行五里至水簾洞

詩 白題梅花莊 宋趙必漣

一間茅屋傍溪斜三徑荒於靖節家但得鶴糧隨分足更須

鋤月種梅花

梅花莊即事 趙若樾

可意黃鸝喚得醒日移春影正當庭飛花忽趁東風過點破

蒼苔一片青

題梅花莊 劉濟

莊後莊前十萬枝元方題扁季方詩何當把酒依花樹坐到

參橫月落時

西逕 自星村渡北行十里始至棠嶺又東行復交水

簾又西北行至官莊大路武夷之界矣

棠嶺 在白崖南與七曲三仰峯連背當崇安達邵武之孔

道乃武夷入脈處也俗呼長嶺

桃源洞 棠嶺南亦倚三仰峯背四岩環抱其中平行田廬

幽邃人跡罕至可以避世如武陵也故各有石洞相傳扣冰

古佛嘗棲止于此

詩 桃源洞 明莊一俊

轉逕入山洞自斜碧桃時結千年花東風散與漁人醉鐵

笛飄來四五家

又

江騰鱗

蕭然一洞藏幽壑野水寒雲長寂寞世上漁郎不問津桃
花門外空零落

又

鄧 遷

仙翁已去桃源洞十里桃花春自開桃花古洞年年發
問仙翁何日回三逕烟霞冲佑觀千峯蘿日釣魚臺仙翁
只在人間世一劍周遊去復來

第巖 棠嶺東北五里許章室岩之右肩也頂呼上章堂
右壁橫巨數十丈多生筍竹 國朝僧超位因易今名筍
室曰莫庵傍有泉源味極甘冽其徒明開字鐵華康熙五

十年雲遊京師

誠親王書洞天花雨額賜之恭揭庵內陳太史夢雷有送明

開還山序

序 送鐵華尚人歸武夷序

國朝 陳夢雷

武夷在道書為第十六洞天靈竒濠秀甲天下鐵公和尚
居之五十餘年矣鐵公以臨濟之傳與其師伯明覺禪師
先後大振宗風于吾鄉明覺禪師蒙

世祖章皇帝召對說法禁庭賜紫衣勅印而鐵公鍵戶武夷山
中泊然於世緣若無所問者年七十有四一旦杖錫入長
安以辛卯正月謁余于病中余驚喜久之
誠親王扈

蹕賜春寓水村別墅四面皆水榆柳桃杏數百環之俯臨大河右挾四山草堂中有書萬餘卷鐵公再訪余欣然爲雷連忘其幾晨夕也

誠親王雅聞鐵公與余善一日步至余一方草亭訪鐵公即以禪宗大畧鐵公道情樸穆音吐洪朗機圓指暢

王深許可因大書洞天花雨四字以賜鉄公爲明覺禪師安國寺請題額

王併書南天寶筏四字以賜時值春光駘蕩北土冰融鉄公遂將賞舟南歸從余諸別余不覺惘然於太極陰陽動靜互相爲根之理爲之一撫掌也余自筮仕以逮顛沛流離患難震蕩播遷得見天日乃以受

恩深重思竭尺寸比老病支離頰啟乞歸又不獲

賜允夢魂徒繞幔亭王女左右思一遂所願閉戶深山不可得動輒思靜其理固然而鉄公以五十年山中老衲乃以耄耄之年飄然杖屨五六千里之外所謂靜極而動或可即此以信余之勢極而靜則幔亭王女之旁竹籬茅舍魚鳥爲朋麀鹿作侶閉關絕跡一枕羲皇終必有其期乎鉄公存余言以爲左券煮茶以待可也遂書以送之

詩 筇巖

國朝馮柱雄

招提首在號章堂帝子揮毫額上方陰整谿訝藏佛閣長橋宛轉鎖蓮塘筇笻扶嶺外僧歸院葉響林間鹿過岡最是寺前山色好老梅古栢晚蒼蒼

章堂岩 石壁聳拔有瀑布自岩頂下大旱不竭岩半有雲水洞僧寮悉結其中望之若挂木末甚有趣致

詩 贈鐵華上人

國朝戚麟祥

天下名山數武夷偶飛一錫到京師來從舍衛施金處歸在清和浴佛時六六峯高雲滿袖三三溪曲水盈卮掉頭轉望長安市千里緇塵馬面吹

送贈鐵華上人四截

潘錦

念中不踏武夷山惆悵流光彈指間今日塵埃逢老鐵馬應相對話衰顏

箬帽櫻鞋返舊棲禪心無復絮沾泥他年若肯開蓮社終為陶潛過虎溪

拍板豕風益自珍壽公半偈尚如新洞天法席因緣在童掃章堂作主人

囊空不辦買山貲肯為鷓鴣假一枝衰病祇今歸未得傷心寫寄惠連詩

次前韻贈鐵華上人

陸廷燦

詩傳九曲好溪山夢想依稀廿載間却喜銅符新授綰偶閱相對一開顏

章堂講席稱幽棲澗草岩花蘂紫泥他日携琴訪老鐵茶烹香水勝曹溪

先皇曾賜相庭珍 帝子重頒翰墨新愧我官貧如鶴瘦祇將斷句贈高人

鉢粟瓶花價不資當門龍象繞虬枝勝情遙羨靈山衲枯
坐時吟贈錦詩

宿雲水洞

彭雄飛

木末天空景倍賒偶從石室卧烟霞千峯月出驚啼鳥一
澗雲深鎖落花無事仙童常滌笋多情老衲自烹茶幾回
夢覺鍾聲裏欲向明山老華歲

章堂澗 自章堂而東至玉柱峯下合流香澗

流香澗

清涼峽

澗水自三仰峯北谷中發源其流背

溪而北舊名倒水坑明徐惟和燭始易今名經玉柱峯下
匯章堂澗趨里許與水簾洞之水合流繞段澗巖過石門
至鷄林又合黃龍溪出赤石下大溪澗邊多生山蕙石蒲

香氣襲人故曰流香澗其逕兩岩夾立曲折蜿蜒如行委
巷中約十餘里非停午不見日色故曰清涼峽又有蜂窩
幽竒之境無踰此者

詩

倒水坑作

朱朱 熹

窮幽鮮外慕殖志在邱園即此竟無得空相歲時遷川陸
綿半載煩燠當歸緣憇此蒼山曲洗心聞澗泉

流香澗

國朝僧行操

沿村行數里入谷便聞蘭墜葉浮深澗飛花逐急湍嵐光
侵杖濕苔色襲衣寒欲試清泉味烹茶坐石盤

又

僧超全

山雨初晴溪尚霧澗底流香花滿樹繞七石齒咽寒泉耳

畔濤聲喧不住道人指引挈瓶來欲試雨前花上露天柱
峯高暝色深芒鞋歸踏蒼苔路

玉柱峯 清涼峽口右高數百丈圓若削成亦稱天柱峯旁
又一峯差小頂有石如戴笠狀云是飛來者各爲飛來峯

詩 玉柱峯

國朝馮柱雄

絕磴梯雲四望孤危峯聳插數珊瑚凌霄未許携筇上選石
還當與鶴俱北去層巒許特出南來半壁賴茲扶好擎一指
掀天柱併入蓬瀛作畫圖

青獅岩

白花岩西突兀類蹲獅又名形獅巖匕上有水溜

下爲池冬夏不涸明陽明范虛靈建獅巖隱居于此內有生
春園月臺釣臺桃花林夾禽鳴諸景今皆廢旁有石洞生成

甕牖

國朝僧觀賢築室居之岩麓曰九井巖天然石竇凡

九水甚甘名九星泉對岩之北有鼎山庵

國朝龍溪居士邱文近築室于此岩南卽水簾洞也

記 遊形獅岩記

明衷宗周

岩蓋武夷之別支也以其狀如獅子因遂名之范公虛靈小
隱在焉經始於嘉靖己未去今四十餘載而于余萬曆戊戌
始獲一至遵洲渚而西渡黃栢溪逶迤於田疇山澗之間乍
寬乍隘忽無去路遲迴之際乃於山麓得一間道僅容負擔
兩旁陡絕灌木陰森移數十步豁然平曠稱田高下環繞溪
流遊魚歷歷可數不三里有巖岩突兀貌蹲於天際卽所謂
形獅者是也巖之陽壁立萬仞稍彎若屏而色丹半壁掛飛

閣數楹烟雲掩映微茫中若有人俟於窓櫺者鷄犬聲出雲端
端叶陌盡得小阜半有地數弓其平坦可亭其上循阜折
而東石磴數十百級曲逕縈紆而柴關闢焉關右崖溜水淙
七作環佩聲匯為方池七上環植二色芙蓉俯瞰清波搖風
弄影若矜其艷者花陰犬寧甚主人披衣出迎始知向之作
於窓櫺者主人也一笑登樓七瞰柴關下臨深壑回視所履
則身在層霄即有暴客一夫當之足矣中列堂三間劄劄草
卯遠而望之不啻珠宮貝闕堂之
其數十丈每日夜主
人蹲怪石揮杯勸影足稱月臺自是至絕頂則城邑若帶
竈烟霏間以翠微武夷諸峯低昂拱揖雲谷挿天于是咏左
思招隱詩而下山堂東攀危石而上有岩隆然若釣臺七下

洞可容十許人旁通一竅天然甕牖外窺深不可測烟霧
濛欲墮不墮自非達人則四體為痠矣主人語余茲山見辱
於樵人牧豎者不知幾千百載偶以採藥而至於斯披荆夷
險始聞於人若知所憑依者遂各其詞曰虛靈竊以自號今
棲遲此中者四十餘年矣竟不知我何以得之我何以隱何
以出何以復歸老於茲也于是歷覽諸勝若桃花源來禽塢
先春園與其率子孫耕耨綱罟之處要其山之所從入大類
陶靖節所記桃花源而諸勝過之且桃源人以避無道秦世
七長子孫于此遂與外人絕公則身陽明盛嘗為王臣意言
所會輒兩袖即當過城市訪諸舊好若黃太僕孫左史奕客
詩豪酒人以及不佞輩相見或揖或不揖輒踞上坐時則賸

目大呼曰何不伏道左迎乃公相與大笑且呼酒飲至斗又健飯以故豐頤皤腹酒酣狂歌不擇宮商與至賦詩竟不知其何所師承大旨取詠性靈而已已則兀然而無堅白同異之說是以諸薦紳人士咸謂無虛靈公一坐為不歡嘗戲匿其襪及冠公輒一蹴一襪露頂委蛇委蛇履橐上行市中人笑亦咲人止亦止六街哇然公混々默然不以為異不佞謂公內亦爾否公笑謂否乃於去歲重九日忽絕粒止酒歲一週矣而丹顏胖體不異健飯時步履輕便干昔圍棋竟日夜不疲問其何以爾曰偶然問其何所事曰不知嗟夫惟不知知是以不知公生平恂々如鄙人見人不能道詞而儒而史而隱而見而得茲山而又辟穀若將霞舉者至其運用人

不得而知之而已亦曰不知噫公果何為者耶予自遊茲山今二年所矣一歲而公絕粒冉一歲而公年七十予與公為中表兄弟於是過公稱萬年觴衆賓強之飯強之飲曾無忤容噫公果何如者哉於是乎為之記公范姓名某字某虛某乃其晚號也

詩 青獅巖

國朝馮柱雄

嶮巖蒼鬱勢長蹲俯吼形如百獸尊十月絳桃紅恁早九秋丹桂鯁猶存僧窻開向層崖杪茶竈安于古樹根倒下山椒新插草白雲來去總當門

翠竹窠 青獅岩北由鳥道深入內復平曠四山環抱一水潏洄茂林修竹蒼翠可觀又名白鶴窠俗呼江南竹窠

國朝僧淨叅結茅於此改名穆岩

王志翠竹窠即白鶴窠藍志分載為二誤也其地實近三
仰李志以為在三仰北麓良是

詩 從蘿庵過上章堂至翠竹窠

國朝僧超全

已捨泛曲舟遠尋蘿菴路境幽自忘疲陟嶮屢度鼓子標
一峯亂峯各奔赴迤邐過章堂領要得佳趣冷冷翠竹窠梅
花開滿樹飛錫有道人掛瓢喜同住峻嶒三仰峯武夷最高
處此為島山中仙靈所群聚碧霄古洞深遊客多却去我欲
一躋攀連朝苦風雨日夕坐山樓凄然感歲暮

竹窠

馮粹雄

山當凹處結茅庵藜碧千竿莫漫探鶴去但尋松作蓋雲來

嘗愛石為龕心空自得淇園輒禪悅還從玉板叅數畝團
幽徑裏更饒煨菊供清談

古井窟 翠竹窠西棠嶺東亦依三仰峯有水從三仰瀉下
注於石窟深碧澄泓四時不涸僧心坦坵室于此
黎道岩 古井窟南隔澗相對江志云宋末詹進士避寇於
此石壘猶存上有招仙館今廢

笠盤岩 黎道岩南峭辟峻險

蓮花峯 第岩西北峯巒巖峩竹栢蒼鬱編梯而上頂復平

坦上有石洞可居

集賢峯 蓮花峯東北

國朝僧震青築室其下新立峰名

詩 集賢峯

國朝馮柱雄

名峯第一額名

結巖隈方丈蓬壺費剪裁紅雨碧雲生洞壑春風明月起樓
臺有時粥鼓中天響無數緇瓢下界來廬阜郎今懷惠遠蒸
藜煨芋坐苜蓿

喬岩 集賢峯北俗名喬坑

蘆岫 在喬岩西北其巔有深密庵萬楚間道士毛守中
鄧又深公以詩扁曰白雲深處旁有閔七室白雲鄉崇廣文

劉良有記

記深密庵記

明劉良

余少時閱明道自序云出入二氏十餘年此心方得融徹乃

知二氏亦有養心之助未可拒不與通也鄧定宇先生養晦
山中與方外一呆毛子烟霞雅契余因得接談所言皆吾儒
之旨志向清高豫章諸君子皆與之友久而愈篤萬曆壬辰
冬余來署崇安教諭事毛子遊武夷已謂余云遍探九曲及
三十六峯惟蘆岫一區武夷無出其右山環水繞絕境秘藏
決意結茅以安瓢笠余咲曰道人情況如野鶴閑雲何拘七
畢意乃爾偶因公暇往訪之由水簾洞西進三里許度小澗
北上又二里至其所四山若拱揖谿壑深邃竹樹茂密果堪
為幽人託足地結蘆于斯豈復漫言人境哉象岡元珠毛子
可謂得之矣遂以薄俸相資佐其營創豫章諸君子聞之皆
樂助焉始事丙申之春落成丁酉之夏扁曰深密庵書而記

鷓峯 在蘆岫西北原名沙坪一逕盤迴頂上坦平故名爲坪 國朝僧元根菴室於此新易今名其下即官莊大路矣

岩石刻字

馬頭巖刻 隆慶己巳夏賜進士吏部建安少松滕伯輪來

隆慶壬申夏鄉進士建安天湖謝丰來 隆慶辛未冬賜進

士浦城景山吳中立遊記 又七言絕句一首錄東逕凝雲

庵後

凝雲庵刻 橘隱

杜葛巖刻 景陽洞天 吳中立書 張元怵訪吳公度五言

古一首 見東逕杜葛巖

水簾洞刻 噴龍涎 龍湫漱玉 黃德光劉嶽卿彥集幾叔

章國望同來遊淳熙庚子孟冬三日 劉嶽卿彥叔招胡希

聖朱仲晦梁文叔吳茂實蔡季通馮作肅陳君謨饒廷老任

伯起來遊淳熙辛丑七月二十三日仲晦書 樊獻科白龍

觀記 見東逕清微洞直觀

武夷山志卷之十五終

[Faint bleed-through text from the reverse side of the page, including characters like '夷山志' and '卷之']

武夷山志卷之十六

武夷董天工典齋編集男勅校刊

名賢上

理學

宋

范仲淹字希文汝南人宋仁宗時貲政殿大學士謚文正嘗

有和章岷從事鬪茶歌

楊時字中立將樂人熙寧丙辰進士師程純公顯及歸顯目

送之曰吾道南矣顯率又師其弟正公頤一日頤冥坐與
游醉侍立不去頤覺門外雪深一尺矣歷知瀏陽餘杭

山二縣皆有惠政除荊州教授學者稱爲龜山先生宣和中除遯英殿說書極言朝政邊務靖康初切糾童貫進諫議大夫兼侍講又抗言割地之非擢祭酒疏論蔡京計迫奪士安石封爵去享祀詔從之旋遭詆罷除徽猷閣直學士予祠高宗即位召爲工部侍郎時年已七十六矣力辭老疾乃以龍圖閣直學士予祠致仕八十三歲卒謚文靖嘗過武夷與胡劉諸賢游著有四書解義三經義辨周禮毛詩辨疑并詩文集明宏治時從祀文廟康熙四十四年學臣沈涵請

御書程氏正宗額賜其祠予五人尤著者曰迪字遵道亦遊程門正公目以遠器官奉議大夫

胡安國字康侯宗安人紹聖四年第進士授荊南教授歷遷提舉湖南學薦布衣十繪鄧璋蔡京誣以舉匪人罷歸高宗除給事中命點正左傳因進所著春秋傳上謂深得聖人之旨除侍讀廷臣詆毀除永州予祠加寶文閣直學士退居武夷白鷗武夷翁年六十五卒謚文定止統特從祀文廟成化三年追封建寧伯康熙四十四年學臣沈涵請

御書霜松雪額賜其祠

胡寅字明仲文定公從弟淳子生時以多男欲不舉文定妻夢大魚躍盆中取而子之受業龜山宣和三年第進士歷校書郎遷員外金人陷京師議立異姓與張浚趙鼎不書

議狀棄官歸建亭於武夷曰奪秀進炎間歷遷徽猷閣直
學士卒諡文忠著有論語詳說崇正辨讀史管見斐然集
學者稱致堂先生

胡寧字和仲文定公次子也以陟祀恩補將仕郎時秦檜使
其子焜知樞密院事問外議如何答曰蔡元長父子所爲
豈所望於相公檜大怒指爲故相趙鼎客罷之尋除蕪州
路安撫司叅議改知澧州以疾丐祠卒稱茅堂先生嘗居
武夷文定公傳春秋多出其手又著春秋通旨以羽翼家
學云

胡宏字仁仲文定公季子嘗遊太學師龜山及河東侯師聖
初以廕補承務郎丁父憂服闋肯不出仕求岳麓山長秦

檜愠宏不爲已屈乃以潭州岳麓處之宏奉祠家居一無怨
尤檜死被召已疾革矣卒諡曰明張栻其門人也嘗著有知
言及皇王大紀八十卷詩文五卷學者稱五峯先生子大時
字季隨師張栻又從朱文公遊

胡憲字原仲文定公從子羅定令安老之子也紹興中以鄉貢
入太學尋返故山力田養親廷臣合章以行義聞召賜進士
出身授建寧府教授以母老丐祠歸時秦檜用事隱居樂道
檜死召爲秘書省正字年七十五矣幡然至闕下抗疏言金
必敗盟元臣宿將惟張浚劉琦可用疏入即去上留之不得
命以左宣教郎主管崇道觀使歸食祿卒諡靖肅初禁伊洛
學中夜潛抄誦習後歸武夷日與劉草堂及文靖相討論著

有論語會議學者稱籍溪先生朱文公熹呂成公祖謙及魏
梭之皆其門人文公自言遵父命從遊胡劉三君子而事籍
溪最久得其學尤多云

劉勉之字致中號草堂崇安人開府滋之曾孫也以鄉貢入
京師時禁挾元祐書每潛抄默誦聞涪陵焦定受易於程子
乃與胡籍溪就學南還消過劉文忠安世楊文靖時皆從請
業歸武夷與胡劉諸子講學朱韋齋臨卒托以後事且論
熹師事之勉之爲經理其家妻以女撫教如子侄所著有草
堂文集學者稱白水先生

劉子翬字彥冲自號病翁崇安人忠顯公幹季子也初以廕
補承務郎辟真定幕痛父死國難哭墓三年服除通判興化

軍尋巧祠王管冲佑觀與籍溪草堂爲道義交時朱文公奉
父遺命來遊于門事繼母及兄子羽極盡孝友年四十七卒
累階右承議郎謚文靖居屏山下學者稱爲屏山先生著屏
山集二十卷子玘字平甫有逸才事母以孝聞爲從事郎著
詩集十卷

李侗字愿中延平人少豪勇常夜醉馳馬爲懽旣冠遊鄉校有
聲聞羅仲素講學師事焉朱熹受業其門以子試吏考部
迎養歸道武夷會開帥汪應辰以書獎相招徃見疾作卒謚
文靖萬歷時從祀文廟康熙四十四年學臣沈涵請
御書靜中氣象額榜於祠

張栻字敬夫號南軒四川綿竹人忠定公浚之長子師胡宏宏

一見稱之曰聖門有人矣以應仕直秘閣孝宗初浚起謫籍
開府治戎參佐棊內贊機務外泰庶政召赴行在前後讜論
甚多歷遷吏部侍郎因忌求去詔以右文殿修撰奉祀武夷
冲佑觀年四十八卒謚曰宣從祀孔廟著有論孟太極說經
世紀年詩文集

呂祖謙字伯恭號東萊其先世萊州人五世祖夷簡高祖公
著曾祖希哲皆居壽州祖好問遷婺州父本中家學淵源有
中原文獻之稱成進士後中博學宏詞科召為博士兼國史
院編修歷直秘閣主管冲佑觀復除著作郎年四十五卒謚
曰成從祀孔廟初從林拙齋胡原仲遊與文公講習於武夷
最久著有博議經史圖節官箴辨志錄弟祖儉字子約太府

寺丞以書擊韓侂胄竄嶺表

朱熹字元晦一字仲晦紹興戊辰進士歷官寶文閣待制贈太
師謚曰文追封徽國公宋淳祐時從祀孔廟先世居徽之婺
源父韋齋讀書於新安紫陽山以進士為政和縣尉倚寓建
劍間館於尤溪鄭氏而生熹時建炎四年庚戌也韋齋學本
龜山歷官吏部員外郎以不附秦檜請祠居建州扶草以書
託孤於劉子羽子羽為築室里第之傍熹乃奉母遷崇安榜
其居曰紫陽書堂示不忘故鄉也以父遺命師胡籍溪劉屏
山劉草堂草堂以女妻之後又受學於李愿中嘗結廬建陽
蘆山之雲谷曰晦庵因以自號亦稱雲谷老人復築精舍於
武夷時年五十有四後卜居建陽考亭六十二矣號滄州病

嬰最後筮得遯之同人更號遯翁登第五十年歷仕四朝在外者九年立朝纔四十日數為權奸所沮閑居四十餘年嘗主管華州雲臺觀又主管冲佑觀年七十有一卒蓋寧宗慶元六年庚申也子三塾將仕郎埜迪功郎在賓謨閣待制車熙二十六年

御賜學達性天額於五曲書院四十四年

聖祖南巡又書大儒世澤額並誠意正心闡鄒魯之實學主敬窮理紹廉洛之真傳聯頌於考亭家祠

蔡元定字季通建陽人築室建陽西山學者因稱西山先生聞朱文公名往師之文公叩其學驚曰此吾老友不當在弟子列韓侂胄設僞學禁文公首被黜元定謫道州文公與侂胄遊

諸子餞別於考亭靖安寺時邱膺泣下不能止眾皆感動文公微視元定不與平時因嘆曰友朋相愛之情季通不挫之

志可謂兩得矣次日文公與宿寒泉精舍因同訂叅同契終久不窺乃別寓書文公曰間關萬狀然自反而縮殊覺怡然

貽書訓諸子獨行不嫌影獨寤不嫌衾勿以吾得罪故遂懈其志踰年以疾卒於謫所侂胄誅贈迪功郎諸文節所著有

大衍詳說律呂新書皇極經世指要子三人淵字伯靜號節齋著太極通旨易解沈攷名知方字復之登寧宗進士官兩

浙運幹著春秋五論稱復齋先生沈字仲然號九峯從朱文公遊文公晚年以訓釋尚書屬之成集傳在道州及卒徒跣

扶柩歸年三十絕意仕途建南書堂於武夷六十四歲卒

正夷山志 卷之
謚文正明正統二年從祀孔廟嘉靖間比程太中朱獻靖例
以元定從祀啟聖祠康熙四十五年

御書賜元定額紫陽羽翼沉額學闡圖疇九學臣沈涵請也沈
子二模字仲覺號覺軒著續近思錄易傳集解淳祐間授迪
功郎本學教授請願鹿洞學規於州縣杭字仲節號九軒紹
定己丑進士累官叅知政事謚文簡後更文肅武夷之詠歸
堂乃其讀書處也

黃幹字直卿一字季直號勉齋閩縣人御史瑀之子劉子澄一
見尚之以書進文公文公見其志堅思苦以女妻之刪定諸
書皆與論議編禮分掌喪祭二篇病革以深衣及所著書授
之初文公帥湖南時命奉寧宗郎位表奏補將仕郎

川新淦二縣通判安澤建康除知安慶府致仕謚文肅中
間予祠者二兩主管武夷冲佑觀文公季子在及諸孫皆其
門人著有經解文集兄東弟果俱文公門人

方士繇字伯謨號遠菴莆田人父豐之依崇安劉彥修遂家焉
十繇受學於文公遊郡庠不踐塲屋棲止五曲仁智堂六經
皆通尤深於易精各種書法著有遠菴集

江默字德功崇安人中乾道己丑科歷宰光澤建寧皆有異政
嘗從文公於武夷著周易四書訓解本朝典故綱册上於朝
孝宗褒美賜緋魚袋弟點爲郢州錄叅雪冤摘伏多異政從
子墳真文忠公門人嘉定進士官至開州知州

歐陽光祖字慶嗣崇安人從劉文靖朱文公學文靖嘗曰志同

合未有若慶嗣者文公令三子帥事焉登乾道壬辰進士
趙忠定公汝愚張宣公拭薦於朝爲江西運幹

劉燾字晦伯建陽人父懋字子勉號恒軒著述甚富燾與弟炳
烟同學於文公乾道壬辰第進士敷歷外吏皆有政聲學禁
起築雲莊山房於武夷自號雲莊居士累官工部尚書上疏
請罷僞學之禁奏刊文公四書集註於學宮卒諡文簡所著
有四書集成禮記解及奏議文集子屋字伯尊號靜齋少從
文公學歷官州縣進秘朝請大夫與蔡沆眞德秀相友善有
毛詩解家禮集註等書孫欽字子明少從蔡沆學精於易以
祖廕補官所至有政聲擢侍御史同知樞密院事稱疾歸隱
武夷曲之茶洞有書經衍義文集十卷卒諡忠簡燾之仲

弟炳字韜仲號睦堂淳熙戊辰進士官至兵部郎中諡文安
文公撰述多與之論訂著有四書問目綱目要畧等書季弟
炯字季明慶元己未進士固始令尋掛冠歸隱徜徉於九曲
之間字

詹體仁元善崇安人隆興初進士調浮梁尉歷晉江丞國子
學錄遷太常博士紹興末除太常少卿時光宗久不過重華
宮體仁陞對極陳父子至恩引易睽孤之義孝宗崩抗疎請
臨祥祭建議定諡曰孝復密贊趙汝愚定大策開禧初知靖
康府除司農卿總湖南餉事卒於官平生爲學以存誠慎獨
爲本帥事朱文公與蔡西山友善眞文忠從之遊嘗問居官
臨民之要曰盡心平心而已著象數總義一卷

熊以寧崇安人從父公遊淳熙戊戌第進士授光澤簿剛介自持嘗謂志伊學顏皆分內事著大學釋義中庸讀說

陳孔碩字庸仲侯官人偕其兄孔夙帥事文公於武夷淳熙

乙未第進士歷任外吏有古循良風官至秘閣修撰數忤韓

侂胄史彌遠歸杜門著書有中庸大學解北山集學者稱北

山先生以子忠肅公韓贈太師孔夙慶元進士

鄭可學字子上號特齋莆田人少孤好學再真禮部不利道過

武夷從父公學文公守漳州延之以教子弟晚年刪完大學

一編曰此書欲付得人惟子上足以當之僞學禁起獨能且

慕追隨夷險一致嘉定庚午授忠州文學調衡州司戶所著

有春秋博議及師說詩集

李闕祖字守約號綱齋光澤人文公高弟嘗留之家塾綱中庸

章句或問輯畧嘉定辛未成進士歷官廣西帥幹以勤慎明

恕聞著有問答十卷弟相祖壯相姪方子文子同遊文公之

門相祖字時可文公命編書說三十餘卷壯相字處謙同登

進士除閩清尉文公嘗語以為學之要方子字公膺自少端

謹又公曰觀子為人必寡過然寬大中要規矩和緩中要果

決遂以果名其齋登嘉定甲戌科授泉州推官遷學錄因不

交史彌遠或譖之使言官劾罷著有傳道精語禹音解真文

忠進其書於朝起辰州通判未赴特加朝奉郎致仕文子字

公諱登紹熙癸丑科歷知閩漳二州蜀人咸宗其政教

葉侂道字知道世為括蒼人徙居建陽師事文公後學禁起味

道對策仍本程子知貢舉胡紘指爲僞徒黜之復從文公於
武夷嘉定庚辰登第除鄂州教授歷遷崇正殿說書秘書著
作佐郎諡文修著有四書說大學講義祭法等書子采字仲
圭少從蔡淵學淳祐登進士累官侍講著有近思錄集解西
銘性理解諸書嘗居武夷八曲之鼓子書堂

吳楫字公_澤崇安人少爲諸生鬱鬱不得志退而閉戶讀書與
朱文公蔡文節講明理學文公扁其書室曰悅齋遣子師之
紹興辛未特奏名授臨桂主簿

蔣九言字誠之號默齋初名九思建陽人十歲即爲文詆秦檜
長從張宣公斌遊宣公教以求放心舉江西漕司進士第一
調古田尉歷江州錄事沿海制司幹官入監文思院張宣公

帥廣西辟爲幕屬及翁杓帥金陵又辟撫幹時學禁方嚴九
言作上元明道祠記罷歸乃築室武夷曰水雲寮開禧初又
爲淮西安撫機宜尋知光化軍克荆鄂宣撫秦誥官未行而
卒端平中贈正龍圖閣諡文清

國朝王梓辨裴徐二志皆以水雲寮爲遊文肅公醉建文清重
葺之明正德間楊恒叔山志則以爲建自文清不言文肅
隆慶間邱止山所修縣志云又肅本建陽之長平人歷官
罷歸寓居歷陽沒遂葬於和州至其仲孫鶴復歸長平路
夢神語云逢羊可歇遇虎可居過武夷因結小廬於羊墩
後得沉虎之地居之更名澄澗始籍崇安余考游氏族譜
其言與邱志合則水雲寮無與於文肅明甚衷徐牽引殊

無依據不足憑也諡文清見游氏族譜省志郡

志聞大記皆作文靖茲以族譜爲正

真德秀本姓慎避孝宗諱改真字景元後更景希浦城人應
元五年進士累官資政殿學士諡文忠其學以毋自欺爲本
立朝不滿十載累疏數十萬言皆切當世要務直聲震中外
史彌遠忌之輒擯不用築室武夷山中以斯文自任一宗火
子黨禁之後正學賴以復明著有大學衍義文章正宗諸書
正統間從祀孔廟康熙四十五年學臣沈涵奏請
御書力明正學表其祠子志道仕至戶部侍郎

徐幾字子與號進齋崇安人嘗與詹琦築靜可書堂於武夷博
極群書尤精於易自晦翁之後理學之伸獨臻其奧景定開

廷臣交薦以布衣召對授崇正殿說書上器重之謚純迪功
郎遷廷寧府教授兼典建安書院撰經義以訓多士宇內尊
之稱曰進齋先生熊禾字去非號勿軒晚號退齋崇安人咸
淳三年進士任寧武州司戶叅軍入元不仕退居武夷山中
築洪源書堂於五曲以講學遠近翕然宗之後於所居擴而
充之易爲家塾中祀先師侑以周程張朱五賢學徒彌衆著
有大學講義尚書口義春秋通解易講義書說諸書學者稱
勿軒先生 元

陳普字尚德號霍童寧德人宋末倡明理學派出輔氏而源於
考亭與熊勿軒友善居武夷之陷石堂元初聘爲本省教
授不就四方來學者數百人著有四書集解書傳補遺易說

石堂文集學者稱為石堂先生

雷機字子樞建安人延祐間進士歷任縣尹俱以循吏著聲改翰林待制朝散大夫父德潤遂於易機與弟拱杭皆以易學鳴于時所著經解學者稱雷門易

胡一桂字庭芳婺源人年十八嶺鄉薦試禮部不第退而講學人號雙湖先生嘗而至武夷與熊勿軒永論說泰詎勿軒稱其學業本自朱氏而尤粹於易著有史纂通要勿軒為之序明

羅倫字彝止號一峯江西永豐人成化丙戌狀元授修撰李賢劾之謫泉州府舶司提舉明年詔復官尋以疾辭講學授徒嘗流寓武夷追謚文毅

王守仁初名雲字伯安號陽明餘姚人南冢宰華子也宏治己未進士授兵部主事正德初抗疏救言官忤劉瑾廷杖謫貴州龍場驛丞瑾使人要殺之乃遁跡迂道至閩經夷武流連數月而去瑾誅累官巡撫南贛汀漳勦四郡積寇不征調不加賦運籌有方後擒宸濠遷南大司馬封新建伯嘉靖時又征思田平兩廣以病乞休嘉隆慶間贈新建侯謚文成萬曆十二年從祀孔廟公理學事功掩蓋前代建立祠宇書院凡四十餘所武夷有祠二一在一曲一在五曲所著有傳習錄詩文全集四十卷

湛若水鄒守益唐順之曾遊武夷講學若水字元明號甘泉增城人宏治乙丑進士累官兵部尚書謚文簡著有格物通要

一百卷及甘泉集守益字謙之號東廓安福人正德辛未會
元探花官至祭酒諡文莊初以史官里居師事文成於慶州
順之字應德一字義修號荆川武進人嘉靖己丑會元恩銓
翰宮坊同羅文恭洪先建言被黜後以倭警需才薦用擢淮
陽巡撫追諡襄文守益子善授閩臬司爲其父建祠於武夷
大雲寺故址

蔡烈字文繼號溪人受學於蔡文莊公青年方壯棄舉業嘗遊
武夷居精舍數日曰脚根自此定矣嘉靖初薦舉遺逸以善
母辭著有孝經定本大儒粹言讀書錄諸書

羅洪先字達夫號念庵吉水人嘉靖己丑狀元官贊善以建言
初言世寓武夷講學從遊者甚眾年六十一正襟歛手而逝

謚文恭一曲有祠

趙恒字志貞號特峯晉江人嘉靖戊戌進士以推明經術爲已
任讀書武夷山中遠近之士從初任袁州教職學使者延於
鹿洞集諸俊又師事之後官姚安太守以禮化民一變蠻俗
所著有春秋錄疑等書

李材字孟誠號見羅豐城人嘉靖間進士由刑工兩部主事歷
按粵東兵備滇南晉右僉都御史巡撫鄖陽萬歷卅謫戍漳
州鎮海衛寓居建安著有觀我堂集兵政紀畧等書嘗講學
於武夷四方從學者衆督學徐即登建書院於九曲以居之
即登萬歷癸未進士材之同邑門人也

董應舉字崇相號見龍閩縣人萬歷戊戌進士初任廣州教授

稅璫欲於學宮闕地馳射應舉率諸生譁之璫氣奪而止擢
南博士累官工部侍郎嘗建屯田之策崔魏忌之格其議泐
功垂成而隳識者惜焉尋爲阿璫者劾罷居武夷之八曲涵
翠洞與生徒講學老而不倦著有文集建祠於四曲御茶園
通仙井左

其寅亮字冰鑑號杞瞻錢塘人萬歷辛丑進士文章政事理學
皆有可稱初因父大成任崇安縣丞隨至閩讀書武夷山中
天啟間督學閩中廉明造士諸生建祠祀之

黃道周字幼元一字螭若處石齋漳浦人天啟壬戌進士人史
館歷少詹事初忤魏忠賢鐫級褫職者再廷杖詔獄尋復原
官謝病歸寓武夷講學經歲後伏節而死明末論人物者以

山陰劉念臺宗周及先生爲士林儀表云

官守

宋

趙抃字閱道其先京兆奉天人五代之亂始移越遂爲衢州西
安人景祐元年進士初授武安軍節度推官秩滿遷著作郎
知崇安縣事爲政簡易晝之所爲夜必焚香告天不敢告者
不敢爲也邑南郊田公鑿渠引西郊水以灌之又於南郊築
隄引水至新陽溉田不下數千畝至今稱其隄曰清獻隄渠
曰清獻渠縣圃有手植梅後人立石銘曰召有棠萊有栢清

獻之梅婢以石嘗結亭於武夷名曰吏隱為公餘遊息之所
遷御史彈劾不避權貴時有鐵面御史之號知成都以一琴
一鶴自隨未幾叅知政事論青苗法詆王安石出知青州時
有蝗自死麥大有秋知越州歲饑疫公發廩施藥民以獲全
他如在睦在杭在虔在河北政皆以惠利為本後以大學士
加太子少保政仕卒贈太子少師謚清獻公為人和易溫厚
嫁兄弟之女以十數在官為人嫁孤女二十餘居鄉葺暴骨
施棺給薪無算蘇文忠撰神道碑所載甚詳著有清獻集子
吼官至太僕少卿

汪應辰字聖錫玉山人紹興五年進士第一除鎮東軍簽判入
為正字忤秦檜出判建寧改袁州召為吏部郎又出知婺州

州福州尋以學士為四川制置使兼宣撫進吏部尚書兼學
士中貴嫉其直交謗予嗣卒於武夷呂成公祖謙嘗師事之
諸葛廷瑞字麟之泉州南安人紹興丁丑進士乾道三年為崇
安有創趙清獻胡文定祠於學宮文公為之記後以起居舍
人使金七人請易衣冠詰難數回至露亦不能奪乃加禮歸
之孝宗稱其老成端重除吏部侍郎改兵部侍郎卒贈太子
少保嘗冒雪至武夷二曲後人遂於登臨處各舞雪臺重其
人存其迹也

韓元吉字無咎潁川人紹興間由建安令陞守建寧表率端莊
興學立教士民皆德之以軍功轉朝奉大夫仕至吏部尚書
當在任時常尋武夷九曲之勝多題詠素與朱子交善精舍

成屬筆爲記

趙汝愚字子直宋宗室居餘干成進士以修撰授福州兩至崇安設有舉子舍三所一在冲佑觀當紹熙內禪之際使國家危而復安汝愚力也韓侂胄忌之竄永州行至衡州又使衡守錢鏐辱竄之遂暴卒侂胄誅復官謚忠定

洪邁字景盧號容齋樂平人忠宣公皓季子也中博學宏科有父風以學士使金抗節淳熙中知建寧府威惠並行嘗游武夷浩歌紀勝後以端明殿學士致仕卒謚文敏有容齋五筆夷堅志

王遂字去非一字穎叔金壇人嘉泰二年進士淳祐三年爲建寧太守以文學政事著有遊武夷詩入爲御史累官至學

士立胡多謹論史臣偉之

葉夢鼎字鎮之寧海人以上舍優等繙褐嘗知建寧府築石鼓書堂於八曲景定中簽書樞密院事賈似道造銀關罷兩界會子以爲厲民爭之咸淳初忝知政事進右丞相九年乞還山林扁舟徑歸或以禍福爲言曰廉耻事大死生事小萬無可回之理子應及庶有俱登仕籍

劉克莊字潛夫莆田人嘉定初以任子補宣毅郎知建陽縣歷知漳州淳祐六年賜同進士出身以右文殿修撰知建寧府歷推工部尚書嘗論權臣壞朝綱開邊釁又言濟王寃皆人所難者以龍圖學士致仕卒謚文公曾遊武夷有詩著後村居士集

王桢字子文號潛齋金華人受業真西山嘉熙十二年進士出
 守建寧陞辭上命之曰游胡朱旨風流未泯表厥宅里以率
 其民則予汝懼至郡興起書院文教大興武夷著有詩文寶
 祐初拜端明殿學士簽書樞密院事封吳郡侯有奏議文集
 林天端字子輯温州人景定二年知崇安縣免人戶助綱錢給
 孤貧粟帛修縣獄創太平西橋又崇尚理學增祀胡憲胡寅
 胡宏劉勉之祭元定於學宮嘗重葺五曲書院增建古心堂
 陳夢庚號竹溪宋端平間判泉州
 元

詹光祖字良嗣號片厓崇安人宋景定二年設武夷山長以教
 邑之士子至元初改為教授光祖預其選子天祥天麟

毋逢辰字希說號梅菴劍南人元至元間任建寧府判嘗倡修
 紫陽書院熊勿軒撰疏甚稱許之所謂以蜀西之珍負道南
 之望者也

唐仲實字桂芳一名仲欵縣人甫十歲日記數千言元季為
 南雄路學正洪武中召對稱旨攝紫陽書院山長學者稱白
 雲先生有武夷小稿

王翰字用文元季東阿人為閩行省郎中明興屏居永福不再
 仕尋自殺有友石山人稿子傳別見

明

張矩字孟方其先廣陵人父伯岩為崇安五夫巡檢因卜居屏
 山求胡劉諸賢遺書授矩學成名立人以北山學士呼之洪

武三年以薦授本學司訓闡發理學啓迪多士七歌之曰前
有載後自拭彼美孟方匹休無斃武夷會真廟撰有碑記
曹端字公正華州人洪武時以監生授刑部主事陞常州府同
知因調民修城失奏左遷崇安令嘗置二簿紀民善惡民用
感化公退之餘流覽武夷溪山後復爲刑部主事累官至雲
南布政使引年致仕猶給半俸以優之崇祀名宦
夏原吉字維喆湘陰人以國子生入禁書誥勅受知太祖授戶
部主事建文初以戶部侍郎充採訪使巡福建永樂初爲
部尚書進少保賜銀曰繩愆糾繆宣德初又賜詔金銀帛
曰含宏貞靖卒贈太師謚忠靖嘗過武夷有詩紀遊予瑄官
尚寶少卿孫崇文舉進士宏治間官右通政

蘇伯厚原名埤建安人與其從子鉅嘗登臨武夷多題咏洪武

乙丑以明經授建寧訓導永樂初入翰林預修實錄大典卒
於官著有素履集鉅字良聲工詩善書畫有竹坡樓集

載珊字廷珍浮梁人宏治間爲閩左右方伯嘗遊武夷有詩累
官刑部尚書左都御史以清廉著卒贈官保謚恭簡

蕭乾元字必克萬安人成進士任建寧僉事道持已恪恭剔奸
嚴毅有德於民

周鶴字文議華亭人爲福建巡按

周震崑山人爲福建清軍御史

二周與蕭僉道同修武夷書院置田供祀稱盛舉焉

顧慶圭字武祥崑山人嘉靖癸未進士初爲閩叅政再爲閩臬

司陞江藩平生清約自足猶爲寒素有贅疣集嘗遊武夷有
題咏

萬虞愷字懋鄉南昌人嘉靖戊戌進士以兵垣外轉監司仕至
少司寇有楓潭詩鈔

劉侃字正言京山人嘉靖癸丑進士由右藩轉左藩有新陽館
集

宋儀望字望之永豐人嘉靖丁未進士歷督學叅政仕至大理
寺卿有陽山集華陽集

顧大典字道行吳江人隆慶戊辰進士亦以副使督學有清音
集

二顧同萬劉宋先後任閩中司道皆有遊武夷題咏

李元陽字仁甫號中溪太和人嘉靖丙戌進士以御史按閩後
遷荆守有詩集

江以達字子順號午坡貴溪人嘉靖丙戌進士以刑部郎典閩
試嗣復督學後遷湖廣副使有午坡集

時徹字惟靜號東沙鄞縣人嘉靖癸未進士叅政閩中累官
兵部尚書素以風雅名有芝園集

汪佃字友之弋陽人正德丁丑進士以侍讀出爲建南分憲歷
官止詹有東麓集

李江張汪四公同於嘉靖戊戌歲梯大王峯之壁勒石
爲記

李東光字晉卿南昌人爲建陽令有廉操終太僕寺丞

郭端大庾人爲崇安令以清白著秩滿不能治裝里胥醵金爲贐却之曰醋味成酸其性難變

李郭二公與李元陽四公同遊大王峯皆見之題壁者也
錢爍字君望南通州人嘉靖壬辰進士官至叅議初知建寧府殫心愛民時徭役繁重編庫子編夫保民有千金之產者立盡爍力爲調劑去冗剔蠹合郡德之又奏免武夷茶貢請以歲編茶夫及水脚銀兩贖府造辦自此遂罷武夷茶場崇民積困蓋自公而甦也

宋衡字士南萬安人登嘉靖壬辰榜以邑令歷官監司藩臬巡撫山東人佐吏工二部值河決爲總河疏濬河道奏請開新渠運道大通御製詩以褒之卒加太子太保先嘗督閩學遊

武夷刻字於一曲之水光石時爲嘉靖甲寅之夏也所輯有道南原委錄

宗臣字子相蕪方城揚州興化人嘉靖庚戌進士武夷冲佑觀右有宗學使祠先是任福州守道守城禦倭開門納逃民數萬又伏火器以潰賊殊績偉然肖之烏石山亦有祠

徐中行字子與號天目長興人嘉靖庚戌進士爲福州兵備副使轉督糧叅政進臬司釐弊祥刑歷有偉績遷江右布政閩人愛戴之建徐方伯祠於武夷冲佑觀右

吳國倫字明卿興國州人嘉靖庚戌進士授中書進給事仕至河南叅政嘗官建寧司馬與徐中行宗臣官遊武夷著有甌孰洞稿數十卷

王世懋字敬美號麟洲太倉人薊遼總制忬之次子也與兄世貞俱負海內重望登嘉靖己未進士萬歷間視學閩中循鑑精絕所拔多奇士秩滿轉叅政尋擢南太常寺少卿先是制公開府閩浙迄督師薊北以不附嚴嵩被禍穆廟辨雪詔追復原官世懋至武夷建祠於冲佑觀左以祀之

汪道昆字伯玉歙縣人嘉靖丁未進士福建巡撫陞官兵部侍郎有南溟集

樊獻科字文叔號斗山縉雲人以進士官侍御代巡閩省時倭寇熾甚巡撫與諸將謀鍵城以守獻科憤然曰人臣奉問書境外苟利社稷專之可也巡撫聞之決職倭遂就殲前後兩入武夷題刻凡數處又藏魏王子騫顱骨於仙館岩為文勒

石以記之

殷從儉字汝中桂林人隆慶初巡撫閩中時倭寇初殄籍民丁

田為戎餉有闕下糧六之派儉至悉為草除積困以蘇不以

家口自隨衣食檢約率於官吏民縞素送喪者載道建祠於

西湖祀之嘗遊武夷水光石有勒記

趙泰魯字宗傳鄞縣人隆慶時進士萬歷間督學八閩聞母病

封還璽書就道憂終起原官風操愈勵擢光祿少卿尋為閩

撫博大寬仁法令畫一仕至大司寇嘗至武夷於一曲水光

石勒字署曰四明山人蓋其別號也

耿定力字子健號叔臺麻城人隆慶辛未進士官至兵部侍郎

與兄定向講學齊名任操江時疏陳權使罔利并極言中使

之害督學閩中識拔皆知名士與鄭李二公同建武夷三友堂於六曲天遊峯

鄭邦福字洪疇一字羽夫號鐵耕上饒人與定力同年由部屬

歷閩省監司能鉅豪釐禦海寇有功晉南岡鄉有詩集

李瑄字邦和號稠原豐城人萬曆丁丑進士官閩僉事端介執

法後以彈劾閣臣削籍耿公有三友堂記

耿定向字楚侗號大臺嘉靖丙辰進士官至大司農謚恭簡曾

撫閩政治卓然嘗爲崇安令朱璉撰武夷觀復堂記

余乾貞字秉智遂安人隆慶二年以進士知崇安居官簡重得

大體時有倭警四封戒嚴乾貞條上十一事皆處置得宜邑

舊無城特創築之金湯鞏固民至今頌其功嘗至武夷吟眺

怡情召拜侍御史

朱璉字文卿號謹吾新淦人隆慶辛未進士爲崇安令發奸摘

伏豪右歛跡清浮糧定蠲畝修學造橋以政最擢侍御史

遷至副都督建觀復堂於武夷宮後先是道士以宮田典豪

戶火管不歸璉爲之清復自本邑以及建陽凡千餘畝道士

德之即其堂改稱朱公祠以祀之張鳳翼爲撰復田記

郭子章字相奎號青螺泰和人隆慶辛未進士爲建寧司李寬

嚴有體督學徐即登延李中丞材講學於武夷九曲書院嘗

爲記官至大司馬

沈傲峯字叔永歸安人隆慶時進士萬曆間視學八閩嘗勒字

於六曲仙掌峰復任建寧道紀綱明肅屬吏則之

鍾惺字伯敬景陵人萬曆庚戌進士初授行人遷南禮部主事
歷郎中以僉事提學福建事竣遊武夷有詩記

林一煥字中瑩浙江孝廉萬曆間爲崇安令治才明敏能清積
牘號爲神君嘗巡仙蛻禱雨建徐仙樓於冲佑觀左以祀之
顧士琦字惺溆太倉人成進士爲崇安令政嚴彰瘴風俗丕變
調晉江擢侍御嘗作亭於武夷溪畔曰入佳亭今陸令重建
爲問津亭

虞大復字來初金壇人成進士爲崇安令爲民興利曾與主考
張宮諭以誠題名于仙掌峯之石壁

簡霄字騰芳新喻人萬曆甲戌進士官至少司馬嘗代巡福建
容溪集

沈涵德清人隆慶時進士代巡福建

龔一清字季白義烏人萬曆時進士代巡福建

楊四知字元述祥符人萬曆甲戌進士代巡福建官至廷尉

簡沈龔楊四公或題詩或勒字同爲宦遊

李得陽字景渠廣德人萬曆間閩副使

熊明遇字良孺號壇石進賢人萬曆辛丑進士官至閩僉事

累兵刑二部尚書立朝慷慨不避權倖論者稱有閩撫閩極
著風節嘗於六曲天遊峯構森天閣登陟嘯咏仕至尚書全
家赴水殉國難

蔣葵字南陔熟常人崇正丁丑進士爲建安令造士恤民曾以
公事至崇安覽勝武夷有長歌一首

孫朝讓字光甫號九芝常熟人崇正辛未進士以部屬出守
泉州晉建南道嘗剪凶強以遏亂萌因躬巡關隘登武夷流
覽賦詩後陞閩臬稱疾致仕

柴世埏字蓮生仁和孝廉崇正間令崇安才極精敏而政尚
慈惠民有鬻妻以完逋賦者聞之惻然爲贖歸之秩滿內擢
部屬尋爲海道武夷之王其二賢祠其所修也

張堯政字安臣仁和孝廉宰崇安多武夷題咏以風雅著

國朝

周亮工字元亮號櫟園祥符人崇正庚辰進士累官戶部侍郎
嘗歷閩中藩臬有平邵武士寇功

殷應寅字一生滕縣人以拔貢順治七年爲崇安令時邑令在

返過裴村武夷觀中供應應寅裁去歷官通政爲崇請城蓋
引崇益戴德

范承謨號螺山潘陽人文肅公文程仲子順治壬辰進士由庶
常累遷學士擢浙撫尋拜兵部侍郎總督游聞耿變逆叛公
被執不屈幽繫三載卒遇害贈太子少保謚忠貞一時與公
同殉者親朋至隸卒凡五十三人最著者吳門嵇永仁字留
山遷崇畢萬字完一有泰寧人許鼎者當公在繫時除左右
之後潛負公烈骨歸京師或謂鼎乃武夷仙靈所使公默有
所喻呼之爲武夷子贈以長歆有螺山落魄武夷開之句公
博學工詩文遭難多所散失僅存吾廬稿浙聞奏議及百苦
吟畫壁詩文十餘卷行世公子時崇字自牧亦總督浙閩多

善政陞官兵部尙書

王頊齡號珊瑚華亭人康熙丙辰進士甲子典試福建官內閣
大學士

覺羅滿保號烏山康熙甲戌進士任閩浙督部院戊戌年重修
武夷精舍有碑記

丁耀亢號野鶴青州人順治明經惠安令有詩文集

曰壁琛奉天籍陝西人由蔭生爲建南道取事陞江西督糧叅
議迂道至武夷流連登覽時康熙四十四年也

沈涵字度江靈心齋歸安人康熙丙辰進士康熙四十二年以
青宮侍讀來視閩學閩中詞林司衡自此始也崇奉先儒奏
請 賜額者凡七祠又從邑令王梓請於武夷紫陽書院立

文公後裔朱元煒爲弟子員以奉祀四十五年賞捧

御書霜松雪栢額抵崇安胡文定公安國祠時同至者爲建延
邵道隄公廷統號秋厓澤州人事竣曾遊武夷登天遊眺望
各有詩文

阿金字雲舉蒲州人康熙辛未進士翰林檢討典試福建識拔
真才至武夷有題咏

來謙鳴字聲吉浙江蕭山人雍正癸卯進士奉

旨尖圈記名以各館効力及內廷教習用仍拔爲翰林甲辰春
授椒園萬善殿教習尋下內鞞服闋爲直隸魏縣令清廉果
毅爲民興利以政最薦擢雲南澂江府太守時有苗警親勦
以除宵小有平土寇功薦調昭通府太守晉廣西右江道尋

擢廣東鹽運司旋調延建邵道紀綱明肅屬吏則之嘗攝建
守造者棚以杜場弊浚城河溯河源培龍脉而藉元氣建
義學以振文風造士恤民無利不興雖龔黃卓魯無以過之
間干巡邑公餘過武夷流連題咏有和朱子權歌志載不朽

史曾期號晴帆江西南荆溪人雍正癸卯孝廉授內閣中書

特署內閣侍讀補授鳳陽府司馬仁風洋溢隨署鳳陽府太守

運漕有功紀錄加級旋署六安州守又署廬州府太守太平

府太守寧國府太守安慶府太守五府一州德教誕敷於

隆十一年丁艱守制服闋以卓異引見奉

旨曾授南安司馬到任即陞旋署南安府太守庚午夏賈殿建

寧府太守下車之下無弊不察無利不振建義學以培士
風選鄉約以宣

聖化適值米價沸騰衍闕道之善術師文正之良規闔郡安寧

間於公餘過武夷特命良工細繪山圖展卷出遊云

魏麟徵號蒼石溧陽人康熙丁未進士九卿以清名薦舉授

邵武太守居官仁厚德政多端著有石屋詩鈔行世

龐塏號雪崖任邳人康熙己未舉博學宏詞授翰林檢討出

守建寧事竣遊武夷題詩紀勝勒字巖石

張翔鳳號南野四川安岳人康熙辛未進士由翰林出守建

寧民譽夙昭天資醇厚以庾匏之才播龔黃之績因修復

文公精舍嘗屢過武夷焉

李天爵號逸齋合肥人相國容齋之胞弟福州別駕署事建寧嘗屏從過武夷留連各勝風雅絕俗

陳朝儼字陞來黟望庵仁和人甌寧令康熙丙戌年至武夷有公餘草武夷遊草

程湄字伊在號兼庵江都人康熙甲戌進士崇安令振興文教樂育人材嘗遊武夷有詩

王梓字琴伯邵陽人爲崇安令有吏才善詩好客建羣賢祠於一曲嘗纂武夷志擢守州去

李輔寅號木亭程鄉人康熙癸酉孝廉建陽令

陸廷燦字扶照嘉定人以明經爲崇安令潔已愛民旌別叔愿嘗全王草堂較訂武夷志山表章徃哲刊播各集每於

公事入山遇景留題文章經濟兼而有之

黃鑒字斌玉福州人由明經任邵武府學教授康熙庚寅冬遊山

藍陳畧字勳卿漳浦人舉孝廉建陽教諭輯有武夷紀要二卷未刊行世

陳銓號榕亭侯官人康熙乙卯選貢壽寧廣文陞東鄉令

鄭瓚號慎庵侯官人康熙庚申舉人崇安教諭充浙江同考官輯有武夷山志未刊行世

龔駿聲字聲遠邵武孝廉爲崇安教諭倡建學宮嘗遊武夷有留題

倪煒字懌仲晉江人以明經爲崇安司訓同龔司鐸倡建學

宮時李相國安溪先生遊武夷謁文公祠俛從之遊告以
祠屋殘破相國白之當道五曲書院煥然重新

何瀚字君濟號北海閩縣人康熙丁酉孝廉掣入刑部學習
揀署廣東從化電白一縣令政簡刑平性愛靜寂改就廣
文乾隆甲子任崇安教諭訓迪有方學問淵博長于書精
于詩古文詩稿盈笥彙篋嘗遊武夷多所題咏至管

宋

程振字伯起樂平人徽宗時爲御史遷司業忤王黼罷提舉
冲佑觀居三年起原官進吏部侍郎靖康之變振爲開封
尹歾之端平初謚剛愍

劉文靖公子翬紹興元年辭興化通判主管冲佑觀有詩云

幾年歸夢水雲間猿鶴重尋已厚顏慚愧君恩猶竊祿官
衙初帶武夷山蓋初啣命歸武夷時作也詳理學傳

張維字振綱一字仲欽南平人紹興八年進士調汀州軍推
官有平盜功改知閩縣民服其廉號曰張太清歷官書

左司郎中尋以讒罷主管武夷冲佑觀卒朱文公志其墓
著奏議及盤澗集若干卷

林大中字和叔永康人登紹興庚辰榜歷臺省講官光宗時
論陳賈儉邪寧宗時上書陳韓侂胄奸狀又論彭龜年不
當斤及救呂祖儉駁汪義端遭學禁予祠提舉冲佑觀侂
胄誅召爲吏部尚書簽書樞密院事卒贈資政殿學士謚
正惠有文集三十卷

辛棄疾字幼安號稼軒歷城人紹興間起義兵縛叛將張安國於臨安斬之援江淮川官歷遷湖南安撫皆有平盜山嘗知福州兼安撫慮濱海易亂積錢五十萬緡榜曰備安庫欲以糶穀練兵事未行爲臺臣誣刻予祠者三皆主管冲佑觀理宗朝再秉節鉞終龍圖待制謝枋得稱其慷慨大節不在岳武穆下德祐初贈太師謚文敏著有稼軒集黃永存字堅叟邵武人父中美字文昭靖康初官朝議大夫張邦昌僭位感憤而卒永存其第四子也紹興間進士以才能召爲尙書郎累官至正議大夫嘗以胡請大夫主管武夷佑冲觀

王師愈字與正一字齊賢金華人以進士除金部郎中兼崇

正殿說書累官兩浙提點刑獄上章丐閑提舉冲佑觀率朱文公撰神道碑稱其孝宗初以讐耻未報中原未復爲奏忌者巧語中之轉徙于外以沒有識者爲之嘆恨云

黃度字文叔新昌人登隆興癸未科紹熙間爲御史光宗不過重華宮連疏切諫寧宗初不附侂冑以冲佑觀祿歸養尋起知建康府罷科懼輸送之擾活饑民無算遷寶謨學士至禮部尙書著有史通諸書

李祥字元德無錫人隆興元年進士爲錢塘簿累遷國子祭酒趙忠定以言去國上疏力爭謂汝愚助勞著於社稷精忠貫於天地李洙劾爲黨斥之主管冲佑觀以原官致仕卒謚肅簡

陸游字務觀山陰人初以廢補登仕郎隆興初賜進士出身
敷歷中外論奏甚多范成大帥蜀辟爲參議不拘禮法自
號放翁嘉泰間詔同修孝光兩朝實錄及三朝史權同修
撰兼秘書監書成進寶章閣待制致仕嘗提舉冲佑觀游
才氣超逸尤長於詩七又集凡百三十卷晚年爲韓侂胄
撰南園鬪古泉記見譏清議然考其文曰許閒歸耕爲公
之志則干侂胄有微辭又何嫌乎

彭龜年字子壽清江人乾道己丑進士官秘書郎光宗以不
朝重華宮痛切上疏指左右離間之罪寧宗時遷吏部侍
郎使金文公獨疏論韓侂胄見黜龜年附奏云始臣約熹
同科今熹罷臣宜并斥不報于是條數其奸力攻之復上

疏求去喜泰初除修撰提舉冲佑觀後以嘗謫閣待制致仕
卒上追念其忠鯁賜謚忠肅擢用其子欽著有經解等書

張宣公弼以右文殿修撰提舉冲佑觀蓋孝宗淳熙初年也詳
理學傳

傅自得字安道晉江人以及死節補丞議郎歷福建提點刑獄
司知興漳進吏部郎中真秘閣兩爲福建轉運副使提點浙
西刑獄罷歸以朝奉大夫直秘閣主管冲佑觀朱文公爲其
行狀云孝友潔廉足高一世吏事亦過人遠甚著有文集三
十二卷仲子伯成爲文公高弟

朱文公熹于淳熙二年以秘書郎奉祠主管冲佑觀後三載起
知南康軍詳理學傳

葉適字正則永嘉人淳熙戊戌進士官司業輪對極言大讐未報疆土未復帝慘然動容侍郎葉栗挾私忿刻朱文公滴抗章辨其悖謬遂罷栗人心沟七適與趙汝愚定議內禪立嘉王中外乃安侂胄擅權遂求補外尋主冲佑觀復什至寶文閣學士卒謚忠定著有水心集

呂成公祖謙歷官博士編修直秘閣尋主管冲佑觀詳理學傳鄭僑字惠叔莆田人乾道己丑進士第一甲僉判累官至資政大學士以觀文殿學士致仕歷仕孝宗光宗寧宗三朝皆以忠實見稱使金不屈淳熙間嘗乞祠主管冲佑觀

王自中字道甫浙江平陽人淳熙中進士授分水令樞密王藺薦召對帝壯其言除知光化軍光宗初主管冲佑觀尋起知

興化軍病不獲用論者惜之

薛叔似號象先永嘉人遊太學釋褐官國子錄孝宗嘉其奏對遷編修除左補闕刻首相王淮去位主管冲佑觀復召爲太

常少卿累官兵部尙書端明殿學士卒謚恭翼有棠二十卷

陳舜申字采謨連江人淳熙甲辰進士合漳浦以循良奏績進著作郎巧祠主骨冲佑觀著有易鑑四書解兵書訂解高齋文集累世同爨里推德門

劉子甫字德修四川陽安人登進士第光宗初擢侍御史抗論朝政逆指熙豐元祐間得失寧宗初改司農少卿進起居全人朱文公領祠再疏爭之侂胄擅政禁僞學光祖撰涪州學記坐謫房州久之主管冲佑觀終顯謨閣直學士卒謚文節

有後溪集十卷

魏了翁名華用號鶴山浦江人登慶元己未進士開禧初以武學博士召試時侂冑謀開邊上言未可卒歸當急內修史彌遠承侂冑意刻其妄乃辭歸侂冑誅擢起居舍人復忤史彌遠山知常德府奸黨再劾之落職居靖州築鶴山書院士多從之遊既六載知濮州以化善俗部使者忌之誣以細事奏罷主冲佑觀數月復原官紹定中又以修撰主冲佑觀彌遠外召爲禮部尚書尋遷樞密院事立朝僅六閱月九二十餘疏言當時急務諸僉士巧爲非憐以資政殿學士知潭州卒謚文靖有五經要畧周易集義鶴山集諸書

趙善湘字清臣宋安懿王五世孫初以恩補保義郎登

慶元二年進士嘉定間知常州主冲佑觀後知湖州歷官兵部尚書進資政殿學士封公著有周易洪範春秋論說四書解及詩詞雜藁

張忠恕字行父綿竹人忠獻公浚之孫也父杓字定叟累官學士知建康府治績爲南渡京尹之最忠恕以祖任監樓店務嘉定間遷知寧國府以言去主冲佑觀尋起知鄂州人爲戶部郎官請外補以直秘閣出知贛州紹定初復提舉冲佑觀致仕

黃文肅公幹主管冲佑觀者凡二一嘉定八年知漢陽軍歸一嘉定十一年知安慶府歸詳理學傳

武夷山志卷之十六終

武夷山志卷之三
武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

武夷山志卷之三
武夷山志卷之三

